


粵太記



自十  
至十二

漢書門			
九	〇	七	六
一	〇	三	大
〇	三	函	號
冊	架	函	號

內閣文庫			
九	〇	七	六
一	〇	三	大
〇	三	函	號
冊	架	函	號

內閣文庫			
番號	漢	9076	
冊數	10 ( 4 )		
函號	232	83	



卷之十

嶺南郭林萬用雨編

百字類

清江流風

清江流風 五管吳賦札書

清江流風 五管吳賦札書

清江流風 五管吳賦札書

清江流風

清江流風 五管吳賦札書



粵大記卷之十

淡香山文庫

嶺南郭棐篤周甫編

宦蹟類

清白流風



漢費貽 孟嘗 吳恢 孔嵩

晉吳隱之 王鎮之 王駿 徐豁

陸徽 王琨 蕭介 王僧儒

王勳

唐劉齡之 馮立 馮元常 唐臨



張東之 王方慶 魏元忠 常承慶

李邕 虞真 張揚 袁高

蕭倣

宋冠 準 李惟清 楊覃 陳從易

包拯 唐介 孔勗 狄集

危佑 黃震 張田 蔣之奇

周 橦 李朴 林扞 楊長孺

敖陶孫 李綸 吳與 吳懿德

鄭格 馬晞驥 蒲壽晟 余琰

明王 溥 邢昭道 同 楊渙

劉實 高瑤 周鐸 周孟中

張澄 林士元 石簡 周啟祥

費貽捷為南安人也少好學有志操為鄉黨所敬重  
王莽末公孫述據蜀僭號時貽漆身為癩佯狂以避  
之退藏山數十餘年述破滅後光武聞其忠義下詔  
徵之仕合浦太守涖政清簡民懷其德或曰合浦江  
山皆名庶者以貽故也

孟嘗字伯周會稽上虞人也其先三世為郡吏並伏

節死難嘗少脩操行仕郡為戶曹吏有寡婦至孝養  
姑姑壽終夫女弟先懷嫌忌乃誣婦鳩其母嘗言其  
枉狀太守不為理嘗謝病去婦竟寃死自是郡中連  
旱二年後太守殷丹問故嘗曰昔東海孝婦感天致  
旱于公一言其澤時降宜戮訟者以謝寃魂庶凶枉  
獲申時雨可期丹從之即刑訟女而祭婦墓天應澍  
雨穀稼以登嘗後策孝廉舉茂才拜徐令遷合浦太  
守郡少產穀而海出珠與交趾比境常通商販買糴  
糧食先時宰守每多貪穢採求不知紀極珠遂漸乏

於交趾郡界於是行旅不至人物無資貧者死餓於  
道嘗求民利病革易前弊曾未踰歲去珠復還被徵  
當行吏民攀車留之不得進乃載鄉民船乘夜遁去  
隱處窮澤身自耕傭士民慕其德就居止者百餘家  
桓帝時尚書同郡楊喬上書薦嘗帝竟不用  
吳恢陳留長垣人也順帝時為南海太守欲殺青簡  
以寫經書子祐年十二隨從到官進諫曰今大人踰  
越五嶺遠在海濱其俗誠陋然奮多珍恠上為國家  
所疑下為權威所望此書若成則載之兼兩昔馬援

以蕙茨興謗王陽以衣囊微名嫌疑之間誠先賢所  
謹也恢乃止撫祐背曰吳氏世不乏季子矣恢臨政  
慎謚世以清白稱之祐後為河間相生二子鳳愷及  
孫駕皆仕宦有名於世

孔嵩字仲山南陽人少遊太學與山陽范式為友後  
式官至荊州刺史而嵩家貧親老乃變名姓傭為新  
野縣阿里街卒式行部到新野而縣選嵩為導騎迎  
式式見而識之呼嵩把臂謂曰子非孔仲山邪對之  
歎息語及平生曰昔與子俱曳長裾遊進帝學吾蒙

國恩致位牧伯而子懷道隱身處於卒伍不亦惜乎  
嵩曰侯嬴長守於賤業晨門肆志於抱關子欲居九  
夷不患其陋貧者士之宜豈為鄙哉式勅縣代嵩嵩  
以為先傭未竟不肯去嵩在阿里正身厲行街中子  
弟皆服其訓化遂辟公府之京師道宿下亭盜共竊  
其馬尋問知其嵩也乃相責讓曰孔仲山善士豈宜  
侵盜乎於是送馬謝之嵩官至南海太守在郡清白  
麤袍糲食如貧賤時時人咸高其節

吳隱之字處默濮陽甄城人美姿容善談論博涉文

史弱冠介立有清操年十餘丁父憂每號泣行人為之流涕事母孝謹及其執喪哀毀過禮每至哭臨之時恒有雙鶴警叫及祥禫之日復有群鴈俱集時人咸以為孝感所致累官至左衛將軍清苦同於貧庶廣州包帶山海珍異所出一篋之寶可資數世然多瘴痿人情憚焉唯貧屢不能自立者求補長吏故前後刺史皆多贖貨朝廷歎革嶺南之弊以隱之為龍驤將軍廣州刺史假節領平越中郎將未至州二十里地名石門有水曰貪泉飲之者懷無厭之歆隱之

既至語其所親曰不見可欲使心不亂越嶺喪清吾知之矣乃至泉所酌而飲之因賦詩曰古人云此水一飲懷千金試使夷齊飲終當不易心及在州清操踰常食不過菜及乾魚而已帷帳器服皆附外庫時人頗謂其矯然始終不易帳下人進魚每剔去骨存肉隱之覺其用意罰而黜焉元興初下詔褒賞及盧循寇南海城陷長子曠之戰沒隱之為循所得循表朝廷請加裁戮詔不許劉裕與循書令遣隱之還久方得返歸舟之日裝無餘資其妻劉氏賫沉香一斤

隱之見之即投於水今沉香浦即其也至家數畝  
小宅籬垣仄陋不蔽風雨嫁女止鬻一犬以辦資粧  
其廉介盖天性云歷度支尚書中領軍每月俸裁留  
身糧其餘悉分親族義熙八年請老詔許之九年卒  
子延之復勵清操為鄱陽太守

王鎮之字伯重瑯琊臨沂人曾祖廙晉驃騎將軍世  
著宦績鎮之初為瑯琊王參軍出為令守在官清潔  
義熙末遷御史中丞執正不撓百僚憚之出為建威  
將軍平越中郎將廣州刺史加都督劉裕謂人曰鎮

之少著清績必將繼美吳隱之嶺南之弊非此子不  
康也在鎮果不受常餽蕭然無營去官之日不異初  
至裕初建相國府為諮議參軍遷宋臺祠部尚書及  
裕篡晉以脚患自陳出為瑯琊太守永初三年卒于  
官年六十六

王駿滄州景城人後徙洛陽駿少孤好學祖有方奇  
之曰是子當興吾家擢明經第貞觀中仕至殿中侍  
御史有知畧求微初為連州刺史民徭安之景龍末  
授桂州都督劉幽求放封州廣州都督周利貞歆必



殺之道出駿所駿知其故留不遣利貞移書趣出求  
駿營採得免由是名益起累遷至同中書門下三品  
卒贈尚書左丞相謚曰忠烈終唐之世刺連州為名  
相以清白稱者駿一人而已

徐豁字萬同東莞姑幕人也父邈晉太子左衛率豁  
起家太學博士元嘉初為始興太守獨勵清操三年  
遣使巡行四方并使郡縣各言損益豁因此表陳三  
事一言人戶隨丁輸米宜量減其課以恤民窮其二  
言鑿坑採砂工役勞苦宜准銀課米以便民其三言

中宿縣俚民丁銀過重宜計丁課米公私兼利在郡  
著績太祖嘉之下詔曰始興太守豁潔已退食恪居  
在官政事脩理惠澤沾被近嶺南荒弊郡境尤甚拯  
卹有方濟厥飢饉雖古之良守幾以尚焉宜蒙褒賁  
以旌清績可賜絹二百匹穀千斛五年以為持節都  
督廣交二州諸軍事寧遠將軍平越中郎將廣州刺  
史未拜卒時年五十一太祖又下詔曰豁廉清勤恪  
著稱所思故擢授南服申其才志不幸喪殞朕甚悼  
之可賜錢十萬布百匹以營葬事

陸徽字休猷吳郡人也應郡辟為主簿歷至尚書都  
官郎出補建康令清平無私為太祖所善元嘉十四  
年為始興太守明年仍除使持節交廣二州諸軍事  
綏遠將軍平越中郎將廣州刺史清名亞王鎮之為  
士民所愛詠上表薦士語在事紀嘗旌戎士陳南妻  
貞節禮俗化行遠邇稱之二十一年徵為南平王鑠  
冠軍司馬後轉益州刺史二十九年卒時年六十二  
身亡之日家無餘財太祖甚痛惜之詔曰徽厲志廉  
潔歷任恪勤奉公盡誠克已無倦褒榮未申不幸風  
殞言念在懷以為傷恨可贈輔國將軍本官如故賜  
錢十萬米二百斛謚曰簡子子勳正貞外郎  
王琨瑯邪臨沂人宋侍中護軍將軍華之從父弟也  
孝建中為建威將軍平越中郎將廣州刺史南土沃  
實官此者常致巨富世云廣州刺史但經城門一過  
便得三十萬琨無所取納表獻祿俸之半州鎮舊有  
鼓吹又啓輸還人服清操謂隱之不能過及罷任孝  
武知其清慰問甚至  
蕭介字茂鏡蘭陵人也祖思話宋開府儀同三司父

惠舊齊左民尚書介少穎悟有器識博涉經史兼善  
屬文齊永元末釋褐著作佐郎天監六年除太子舍  
人累遷給事黃門侍郎大同二年武陵王為揚州刺  
史以介為府長史在職清白為朝廷所稱高祖謂何  
敬容曰蕭介甚貧可處以一郡敬容未對高祖曰始  
興郡項無良守嶺上民頗不安可以介為之由是出  
為始興太守介至任宣布威德境內肅清七年徵為  
少府卿尋加散騎常侍後補侍中中大同二年辭疾  
致仕高祖優詔不許終不肯起乃遣謁者僕射魏祥

就拜光祿大夫太清中侯景於渦陽敗走入壽陽高  
祖密敕納之介上表切諫家居杜門一介不苟取歷  
年七十三卒於家子允初官至光祿大夫而介之清  
操為一時最云

王僧孺東海郟人也魏衛將軍肅八代孫五歲讀孝  
經知大義六歲能屬文既長好學家貧常傭書以養  
母所寫既畢諷誦亦通仕齊歷至治書侍御史出為  
唐令任昉贈詩其為士友推重如此梁天監初除臨  
川王後軍記室參軍侍詔文德省尋出為南海太守

南海殺牛無忌殊非美倍僧孺至便嚴禁止又高涼  
以生口易外國寶物蕃舶每歲數至皆資賈人以通  
貿易舊為州郡市以半價又買而即賣其利數倍歷  
政以為常僧孺嘆曰昔人為蜀部長史終身無蜀物  
吾欲遺子孫者不在越裝並無所取視事期月有詔  
徵還郡民道俗六百人詣闕請留不許既至拜中  
書郎領著作復直文德省後知撰譜事普通三年卒  
年五十八

王勣字公濟琅邪臨沂人父琳司徒左長史齊代娶

梁武帝妹義興長公主勣美風儀博涉經史恬靜清  
簡未嘗以利欵干懷天監初為國子周易生射策舉  
高等除祕書郎大同末拜冠軍將軍南海太守為廣州  
刺史河東王譽長史譽至嶺南多所侵掠因懼罪稱  
疾委州還朝以勣行廣州府事越中饒沃前後守宰  
例多貪縱勣獨以清白著聞入為給事黃門侍郎及  
蕭勃平後以勣舊在嶺表早有政績乃授使持節都  
督廣州等二十州諸軍事平南將軍平越中郎將廣  
州刺史未行改為衡州刺史蕭莊據有止流衡廣瓊

貳勳不得之鎮留于大庾嶺天嘉元年徵為侍中終  
尚書右僕射卒贈中書監謚曰溫  
劉齡之彭城人唐初為廣州都督表稱嶺南州縣多  
用士人任官不顧憲章惟求潤屋其婚嫁資需即稅  
人子女百姓怨苦數叛且都督刺史多居莊宅經旬  
月不至府詞訟皆委判官省理民無所措手足又首  
領娶妻不限多少肆情侵奪縱欲殃民乞嚴禁斷表  
上從之蠻俗稱便威惠大行

馮立同州馮翊人有武藝略涉書記貞觀初為車騎  
將軍突厥至便橋立率數百騎與虜戰於咸陽太宗  
聞而喜歎拜廣州都督前後作牧者多黷貨為蠻夷  
患由是數怨叛立不營產衣食取給而已常至倉泉  
嘆曰此吳隱之所酌泉也飲一杯水何足道哉吾當  
日汲而飲安能易吾性乎遂飲畢而去數年甚有惠  
政卒於官

馮元常相州安陽人曾祖子琮北齊右僕射元常舉  
明經及第高宗時累擢監察御史嘗密諫中宮權重  
常斥瑞物武后怒出之隴州徙劔南有平賊功轉廣

州都督詔便驛赴官安南酋領李嗣仙殺都護劉延  
祐劫州縣詔元常討之率士卒航海馳檄先示禍福  
賊黨多降元常遣兵斬首惡而還雖有功猶以拂旨  
見怨不錄功凡三徙不得至京師卒為酷吏周興所  
陷追赴都下獄死元常閨門雍睦有禮法雖小功喪  
不御私室神龍中旌其家大署曰忠臣之門天下高  
其節凡名族皆願通婚焉

唐臨字本德京兆長安人為侍御史奉使嶺外按交  
州刺史李道彥等申理冤繫三千餘人累轉黃門侍  
郎加銀青光祿大夫永徽元年為御史大夫明年華  
州刺史蕭齡之以前任廣州都督受賂當死詔群臣  
議請論如法詔戮于朝堂臨建言群臣不知天子所  
以議之之意在律有八王族戮于隱議親也刑不上  
大夫議貴也今齡之貪贓狼戾死有餘咎陛下以異  
於他囚故議之有司又令入死非克舜所以用刑者  
不可為後世法高宗從其奏齡之竟得流於嶺外尋  
遷刑部尚書加光祿大夫復歷兵部度支吏部三尚  
書顯慶四年奏遷張倫劔南巡察使李義府惡倫毀

之武后謂臨銓人有私坐免官尋起為潮州刺史治潮勤瘁以惠愛為事卒于官年六十所撰冥報記二卷大行於世臨儉薄寡欲不好治第宅交遊專務掩人過見妻子必正衣冠世重其純行焉

張柬之字孟將襄州襄陽人少補太學生博通經史充好三禮進士擢第補青城丞永昌元年以賢良召時年七十餘矣對策千餘人擢柬之為第一授監察御史歷鳳閣舍人荊州長史武后稱制狄仁傑薦柬之為相首謀誅張易之昌宗遷武后于西宮迎中宗

復辟進中書令尋奪其政柄惟以功封漢陽郡王柬之懇辭不許求還襄州養疾乃授襄州刺史及武三思亂政譖柬之奪爵貶新州司馬仍令長任至州以愷悌臨民治事勤慎已而連貶瀧州聞同事桓彥範等被誅遂不勝憂憤而卒年八十二景雲元年贈中書令謚文貞

王方慶名絀以字行雍州咸陽人周少司空褒之曾孫年十六起家越王府叅軍歷廣州都督南海歲有崑崙乘舶以珍物與中國交市舊都督路元獻冒取

其貨崑崙懷刃殺之及方慶至任數載秋毫無所索  
又管內諸州首領舊多貪縱百姓有詣府稱寃者府  
官以先受首領叅餉未嘗鞫問方慶乃集止府寮絕  
其交往首領縱暴者悉繩之由是境內清肅當時議  
者以為有唐以來治廣州者無出方慶之右有制褒  
之曰朕以鄉歷職著稱故授此官既美化遠聞實副  
朝寄今賜鄉雜綵六十段并瑞錦等物以彰善政遷  
鸞臺侍郎同鳳閣鸞臺平章事長安二年卒謚曰貞  
方慶博學好著述所撰雜書凡二百卷及三禮行于

世

魏元忠宋州宋城人為太學生上封事言命將用兵  
之要高宗善之授秘書省正字遷監察御史帝嘗從  
容曰外以朕為何如主對曰周成康漢文景也然則  
有遺恨乎曰有之王羲方一世豪英而死草萊議者  
謂陛下不能用賢帝曰我適用之聞其死顧已無及  
嗣聖初為御史中丞為酷吏來俊臣所構將就刑神  
色不動前死者宗室子三十餘尸相枕籍於前元忠  
顧曰大丈夫行居此矣俄勅鳳閣舍人馬隱客馳騎



免死傳聲及于市諸囚歡叫元忠獨堅坐左右命起元忠曰未知實否既而隱客至宣詔已乃徐謝亦不改容尋復舊官歷檢校左庶子忤張易之復貶為高要尉至端州即治戎旅備洞寇居朞月民夷恬謐神龍初中宗復位其日即召拜中書令封齊國公卒年七十餘謚曰貞

常承慶字延休鄭州陽武人也其先自京兆徙家于襄陽父思謙事高宗以直聲累遷鳳閣鸞臺三品為納言承慶少恭謹事繼母以孝聞舉進士儀鳳中為

太子司議郎上書諫太子賢近聲色昵小人又獻諭善箴賢稱善賜予甚厚承慶又以人之用心多擾濁浮躁罕請冲和乃著靈臺賦以廣其志武后擢鳳閣鸞臺同平章事以張易之故貶高要尉至任有餽紫硯者置案上歲餘起辰州刺史以前硯還之復封扶陽縣子為黃門侍郎未拜卒贈秘書監謚曰溫

李邕字泰和揚州江都人父賢崇賢館直學士邕少知名始李善注文選邕附事見義世傳其業號文選學既冠見特進李嶠願讀祕書得假直閣萬卷皆應辯

如響嶠歎曰子且名家遂以文章顯拜左拾遺會御  
史中丞宋璟劾張昌宗等反狀武后不應邕立階下  
大言曰璟所陳社稷大計陛下當聽后色解即可璟  
奏五王為武三思所殺邕坐善張柬之貶富州司戶  
叅軍常氏平召拜左臺殿中侍御史彈劾任職人頗  
憚之後為孔璋所劾疏奏邕得減死貶欽州遵化尉  
流璋嶺南而死邕負重名所至聚觀如堵至欽漸罕  
來者乃讀兵書巡詞往來飲欽江之水以為醴泉不  
是過也為文祭之感時傷事作六公詩以美張柬之

桓彥範敬暉袁恕已崔玄暉狄仁傑盡忠唐室因自  
寄焉後為北海太守天寶中吉溫與宰相李林甫因  
他獄傳其罪詔御史羅希奭就郡杖殺之時年七十  
代宗朝始贈祕書監

盧奐滑州靈昌人父懷慎以宰相兼吏部尚書謚文  
成奐早脩整歷任皆以清白聞開元中為中書舍人  
御史中丞陝州刺史二十四年玄宗幸陝城填察其  
能政於廳事題贊而去尋召為兵部侍郎天寶初為  
晉陵太守時南海郡利蕪水陸瓌寶山積劉巨鱗彭

皇大記 卷十 十六  
杲相替為太守五府節度皆坐贓鉅萬而死乃特授  
與為南海太守遐方之地貪吏斂迹中使市舶亦不  
干法人用安之以為自開元以來四十年廣府節度  
清白者宋璟之後有與詔加銀青光祿大夫經三年  
入為尚書左丞卒由是世益重廉吏云

張昶字公表河間人父君卿元和中舉進士詞學知  
名累歷郡守昶會昌四年進士擢第釋褐壽州防禦  
判官于琮布衣時客遊壽春郡守待之不厚昶以琮  
衣冠子異禮遇之琮將別謂昶曰吾餉逆賊翁五十

千郡將之惠不登其數如何昶方奉母家貧適得俸  
絹五十匹盡以遺琮約曰他時出處窮達交相卹也  
昶累辟太原掌書記大中朝琮為翰林學士俄登宰  
輔判度支琮召昶為司勳負外郎判度支尋用為  
翰林學士轉郎中知制誥拜中書舍人戶部侍郎學士  
承旨咸通末為常保衡所構譴逐昶坐貶封州司馬  
封民語不可解昶時以文義教之漸知讀書士子日  
來請益與論文章無倦時及保衡伏誅琮得雪昶量  
移入朝為太子賓客與琮相見大歡然晦慎昶不敢

常晤也遷吏部侍郎京兆尹終檢校吏部尚書天平  
節度使卒年六十四

袁高字公頤滄州東光人祖恕已嘗平武氏之亂事  
中宗封南陽郡王謚貞烈高少慷慨有節尚擢進士  
第代宗朝累遷給事中建中二年出為湖州刺史尋  
拜京畿觀察使坐累貶韶州長史佐郡自守清廉不  
事邊幅而人自敬之政暇賦詩吏民傳誦未及暮復  
拜給事中德宗起新州司馬盧杞為饒州刺史詔出  
高執不下奏杞姦邪罪當誅僂帝曰朕惟卿言切至  
已知奏由是天下悚然仰其直聲卒年六十中外悵  
惜元和中特贈禮部尚書

蕭倣字思道南蘭陵人曾祖太師徐國公嵩開元中  
宰相大和元年擢進士累遷給事中宣宗初治喜直  
言嘗以李璣節度嶺南倣封還詔書語在李承勳傳  
咸通初遷散騎常侍懿宗僻於奉佛上䟽切諫帝甚  
嘉之遷至兵部尚書判度支尋以本官同平章事俄  
而盜起河南內官握兵罷政事自集賢學士拜嶺南  
節度使倣性公廉南方珍賄叢夥月俸之外他物不

以入門家人病醫人治藥須烏梅左右取於公厨以  
和劑做知命亟還之促買於市後遷司空封蘭陵縣  
侯卒子廩字富侯第進士遷尚書郎做領南海解官  
往侍南海多穀紙做敕諸子繕殘書廩諫曰州距京  
師且萬里書成不可露齋必貯以囊笥貪者伺望得  
無意茨嫌乎做曰善吾思不及此乃止故濁亂之際  
克保令名子頎繼登進士第後位亦顯達云

寇準字平仲華州下邳人也至道元年加給事中時  
太宗在位又馮拯等上疏乞立儲貳帝怒斥之嶺南

二年祠南郊中外官皆進秩準素所喜者多得臺省  
清要而不及拯拯恨之陳準擅權乾興元年貶雷州  
司戶參軍初丁謂出準門下至參政事準甚謹嘗會食  
中有羹汚準鬚謂起徐拂之準笑曰參政國之大臣  
乃為官長拂鬚邪謂甚愧之由是傾構日深及準貶  
未幾謂亦南竄道雷州準遣人以一蒸羊逆境上謂  
欲見準準拒絕之聞家僮謀欲報讐者乃杜門使繼  
傳毋得出伺謂行遠乃罷天聖元年徙衡州司馬在  
雷州踰年教民開渠引呂塘水灌東洋田萬頃既卒

衡之命乃至公性素豪奢而在雷時衣粗食厲其于  
淡泊其忠謹大節為縉紳儀表嘗植枯竹平地復生  
時呼兼公竹

李惟清字直臣下邑人父仲行為章丘簿因徙家焉  
開寶中惟清以三史解褐累遷給事中充鹽鐵使淮  
南權貨務左授衛尉少卿俄出知廣州謹敕不苛珎  
貨一無所取至道初就拜右諫議大夫太宗以廉平  
詔獎之二年徙廣南東西路都轉運使召拜給事中  
終御史中丞卒子求錫太子右贊善大夫永德殿中

丞

楊覃字申錫漢太尉震之後覃少獻書於嗣王淑淑  
私署著作佐郎後淑歸朝為禹城尉太平興國八年  
舉進士擢第大中祥符二年改太常少卿直昭文館  
知廣州勤於吏事所至以幹濟稱南海番舶之利前  
後牧守或致謗議惟覃以廉著遠人懷之加右諫議  
大夫四年卒年五十四遣其長子奉禮郎文友乘傳  
赴喪詔本州護柩還其家官給所費錄其次子為揚  
州司戶參軍

陳從易字簡夫晉江人端拱二年進士及第歷彭州  
軍事推官歷遷太常少卿直昭文館知廣州三年遠  
俗安靖璽書褒美加三品服北還不市南物上聞即  
日擢左司郎中知制誥飛白書清字賜之後除龍圖  
閣直學士卒元豐中神宗問蘇頌鄉毋誰氏頌以從  
易對上曰天聖間學士耶頌因言從易知廣州不畜  
南物上曰清節過馬援矣先是宰相寇準惡從易踈  
已除從易吉州及寇準貶道州丁謂語從易曰廬陵  
之事可以釋憾矣從易謂當以故相禮待之謂有愧  
色其志行多類此所著有泉山集二十卷中書制稿  
西清奏議三卷

包拯字希仁廬州合肥人天聖五年進士及第授大  
理評事知天長縣能斷牛獄徙知端州歲貢硯前守  
緣貢歲率數盈十倍以遺權貴拯至革其弊惟充貢  
數而已秩滿不持一硯歸其清介如此被薦為監察  
御史疏請選廣南知州尋又奏請廣南添差職官章  
再上從之官至樞密副使今載祀典又有鄭端義者  
先拯時知端州務農重學常築石城民永懷之

唐介字子方江陵人天聖八年登進士第為監察御史裏行轉殿中侍御史劾宰相文彥博知益州日造間金竒錦緣閣侍進宮掖以得執政帝怒貶春州別駕王舉正言其太重帝旋悟明日取其疏入改置英州而罷彥博相又慮介或道死有殺直臣名乃遣中使護送至貶所圖其像於便殿由是直聲動天下進士李師中送之詩曰孤忠自許世罕有獨立敢言人所難去國一身輕似葉高名千古重於山並遊英俊顏何厚未死奸諛骨已寒天為吾皇扶社稷肯教夫子不生還一時士大夫稱真御史必曰唐子方而不名介居數月盡心政事州人敬仰之如父母嚴事之如神明邑政大行尋召還遷叅知政事未幾卒年六十贈禮部尚書謚質肅子淑問義問孫恕皆仕于朝為名卿而仲子義問風力強敏以集賢修撰知廣州有政聲云

孔勗兖州人孔子四十四代孫進士及第由殿中丞通判廣州以清潔聞真宗東封時躬詣孔子祠問宰相孔氏今孰為賢者或言勗有治行即召對以為太



常博士勗被召蠻酋爭持寶貨以獻勗皆慰遣之一  
介不取

狄棐字輔之潭州長沙人天聖八年知廣州代還不  
以南物自隨人稱其廉

危祐字夢弼南城人天禧三年進士知邵州使者按  
治有所求祐告以民情不從因置笏曰某不敢擾民  
以固位請遂歸百姓遮道留之尋遷太學博士以言  
詆宰相謫守廉州吏進聚珠扇嘆曰身為廉州守而  
執此扇以對吏民獨不愧州名乎却之

黃震字伯起福建浦城人進士及第遷著作郎累轉  
廣南轉運使自守澹素不好異物先是廣南歲進異  
花數千本至都下枯死者十八九道路苦其煩擾震  
奏罷之在真宗朝數論事上嘉之後卒詔進一階

張田字公載澶淵人登進士第熙寧初加龍圖閣直  
學士知廣州廣舊無外郭民悉野處田始築東城環  
七里賦功五十萬兩旬而成初役人相驚以白虎夜  
出田迹知其偽召戒邏者曰今夕有白衣人出入林  
聞者謹捕之如言而獲城即就東南微陷往視之暴

卒年五十四田為人伉直自喜好嫚罵氣陵其下故  
死無哀者然臨政以清女弟聘馬軍帥王凱欲售珠  
犀于廣顧曰南海富諸物但身為市舶使不欲自汙  
爾作欽賢堂繪古昔清刺史像日夕師拜之蘇軾嘗  
讀其書以侔古廉吏

蔣之奇字頴叔宜興人以伯父蔭得官擢進士第歷  
集賢殿修撰知廣州妖人岑深善幻聚黨二千人謀  
取新興畧番禺包據嶺表之奇遣鈴轄楊從先致討  
生擒之加寶文閣待制南海饒寶貨為吏者多貪孽  
之奇取前代收守有清節者吳隱之宋璟盧貞李勉  
等十人繪其像建十賢堂祀之冀變其習徙河北都  
轉運使

周種字仁熟泰州人熙寧中擢第徽宗朝以右文殿  
脩撰知廣州番舶抵郡犀象香珠之屬悉選以充獻  
曰呈樣種一無所受終任不至舶務其歸也部人賦  
詩送行有三年清似鏡之句靖康元年卒幼子方崇  
紹興中歷三院御史擢禮部侍郎

李朴字先之虔之興國人登紹聖元年進士第調臨

江軍司法叅軍移西京國子監教授程頤獨器許之  
移虔州教授以嘗言隆祐太后不當廢處瑤華宮事  
有詔推鞠忌者欲擠之死使人危言動之朴泰然無  
懼色旋追官勒停會赦注汀州司戶右司諫陳瓘薦  
朴有旨召對蔡京惡朴鯁直他執政三擬官皆持之  
不下復以為虔州教授又嗾言者論朴為元祐學術  
不當領師儒罷為肇慶府四會令有奸民言邑東地  
產金寶立額買撲破田疇發墟墓厚賂乃已朴至請  
罷之改承事郎知臨江軍清江縣廣東路安撫司主  
管機宜文字欽宗在東宮聞其名及即位除著作郎  
半歲凡五遷至國子祭酒以疾不能赴高宗即位除  
秘書監趨召未至而卒年六十五贈寶文閣待制官  
其子孫二人中書侍郎馮熙載欲邂逅見朴朴笑曰  
不能見蔡京焉能邂逅馮熙載邪居官所至有聲在  
廣南止其帥孫竢以文具勤王不若發常賦助邊折  
漕使鄭良引真臘取安南之計以息邊患人稱其智  
朴嘗自誌其墓曰以天為心以道為體以時為用其  
可已矣蓋叙其平生云有章貢集二十卷

林扞字廷植晉江人紹興十八年第進士調歸善尉  
獲監盜十餘人白郡守請寬其罪或諭以賞格扞曰  
吾為官吏其可幸赤子之無知以為已功教授肇慶  
府初扞游太學與林孝澤友善時孝澤持節行部不  
入官舍而館于學一日扞謂孝澤曰公宜他徙毋重  
困我因出守貳已下書一束示之皆未啓緘孝澤止  
啓守書予以薦牘翌日守持白金詣扞謝扞曰壅鹽  
一第猶恐不稱何使君待我薄也守慙退始扞居里  
故人為舶屬來訪見扞一室蕭然惟案上圖書數冊  
從容謂曰僊居海濱豈無可委諭者扞曰此言何為  
至我遂不復謁謝遷南恩州簽判卒于官

楊長孺字伯子別號東山潛夫以廕補守湖州累官  
至廣東經畧安撫使知廣州事每對客曰士大夫清  
庶便是七分人矣嶺南群吏獨有長孺清白著于時  
有詔獎諭謂其清似隱之故長孺賦詩有詔謂臣清  
似隱之臣清元不畏人知之句改安撫福建真德秀  
入對寧宗問當今廉吏德秀以長孺對端平以忤權  
貴劾去加集英脩撰致仕紹定元年起判江西憲臺

尋以敷文閣直學士致仕年七十九卒郡人立像與  
吳隱之合祠

敖陶孫字器之福清人少倜儻有大志為文章援筆  
立就弱冠魁鄉薦遂補入太學韓侂胄逐朱熹陶孫  
首以詩送之趙汝愚謫死陶孫哀之以文又揭詩于  
通衢云九原若遇韓忠獻休說渠家末世孫侂胄誅  
死陶孫登進士第為廣州通判詳讞明允終溫陵僉  
判有臞庵集

李綸字世美泉州人以廕歷仕有清操淳熙初提舉  
廣東常平日適伯兄維守恩平酌別江濱兄弟相勵  
以清白綸慷慨臨江籲天曰倘負軍民有如此水遂  
投杯于江杯停不沒者久之觀者驚嘆

吳與字可權漳浦人徙居龍溪知四會縣有惠政常  
論事憲臺燕若蒙勵聲曰乃欲效漢唐令耶荅曰固  
願學之恨不至耳燕為改容徙學省罰有循良風累  
遷奉議郎通判潮州終廣東提刑

吳懿德字夏卿處州慶元人嘉定二年進士英州教  
授知玉山縣改知新會時縣久無正官弊端如毛民

狃于訟且瀕海多盜縣不能制懿德至縣事無鉅細必親時新令至蛋戶有給由錢受訴牒有酥息錢一切罷去凡仕族之流寓與悖獨鎮連無告者廩其食春賦貧民錢粟夏則和藥施之雖溝澮亦時濬治其誠於為民皆此類以廉介有聲辟通判廣州未及拜而卒將沒前二日書于冊曰平生薄宦甘受凍飢一介不取一毫不欺嘗祠晉刺史吳隱之于縣東以勵來者邑民謂其清白可尚遂配享焉西山真德秀誌其墓甚稱重之

鄭格字迪民福清人少穎悟博聞強記時號書櫛淳祐中進士歷建寧司理有清操景定初授廣東察推其操彌勵所親規之曰子冰蘖凜然不知何以為出嶺計格曰既能入嶺豈不能出嶺改知攸縣卒囊無餘財二子堅保從子聚皆博學清介世其家

馬晞驥新會人持國之子淳熙中擢進士歷陞判肇慶府留心佐政有潛以竒硯獻者晞驥謝之曰此非暮夜金但吾職貳郡當飲水自勵何敢以長物污家聲耶其人慙而退焉由是名節益著尋遷知雷州官

至朝議大夫

蒲壽晟咸淳七年知梅州性儉約於民一毫無取每思曾井遺澤建石亭于上曰汲井水二瓶置廡右進士楊圭題其亭有曰曾氏井泉千古冽蒲侯心地一般清

余琰字伯華永豐人登淳祐進士第授廣東提刑持已廉潔當時立廉吏碑公居其一云

王溥字士淵桂林人由進士洪武二十六年歷官為廣東右叅議時匠藝之家勢要占役弗克營生溥禁

止之有奉部檄來徵舵木者立期逼取又木多不中民苦之溥親臨揀閱十取八九先是起運俱由海道風水漂沒民不勝患溥自臨庾嶺遍觀險易命有司鑿石填澗脩葺橋道教民造車運之民賴焉先是慶賀俱設筵宴溥罷之時起無糧無籍軍都司咨取甚亟溥曰國以民為本今一槩起取賦稅從何出耶遂奏聞上是之止起無籍餘皆獲免其第來廣適遇承差何秀同舟知為溥弟送以布衣弟至以實告溥曰一衣雖微不可不慎此汚行辱身之漸也即命還之隨

遣弟歸及獻績父老遮道留不可得歷官數年筭無重衣庖無食饌為胥吏庸庸誣逮赴京行李蕭然寮屬餽饌皆辭不受曰吾豈以患難易其心哉比至得白歸卒年三十有六廣人惜之

邢昭洪武八年来司新會稅貧而能廉介而有守月支俸饘粥不充或日中無食人遺之米亟命持去語妻曰寧饑餓以死不可受滿去無道里之費父老贐之一無所納其狷介若此

太常贊禮郎十年出知番禺縣性剛毅廉潔番禺素稱繁劇而軍衛尤強橫需求百出佐吏動遭笞辱前令不能堪比同至視民如子民亦愛之如父母堅執公法凡事違理者一切不從由是民賴以安權要惡之未幾永嘉侯朱亮祖至數以威福撼同同不為懼時有土豪數十人遇閭里珍貨輒抑價買之稍不如意即誣以鈔法人莫敢誰何同廉問得實捕其首悉械繫通衢以令衆諸豪詣亮祖求辯亮祖召同勞以酒食徐為言之同厲色曰公為大臣不當為小人所



使亮祖不能屈次日亮祖出通衢被械者方曝烈日中哀呼求免亮祖釋之又有富民羅氏納女於亮祖其兄弟因怙勢凌人同按法治之亮祖又奪去復以他事答同同遂歷數其事而奏之疏未至亮祖亦誣同抗訕先聞上不知其由先命使取同首級適同奏亦至上以其職卑而直言大臣有骨鯁風特遣使宥之竟坐亮祖罪二使同日繼至而同已先死邑民甚悼惜之同性峭直器宇魁岸奉母備甘旨與妻子同粗糲布政使徐本雅重同嘗按一醫士罪當答本急欲得醫遣卒語同釋之同曰徐公亦效永嘉侯耶答之乃已後同卒于官縣吏有奉其主于家者出入輒告應驗如神云

楊渙字德濟泰和人由進士正統間知四會縣廉能惠愛甚得民心邑有斷腸草貧民有爭輒服此以圖賴人多被其害渙至出令民有事陳訴者納草百根方與受理積而燒之暮年絕種其訟遂止黃寇逼境民懼欲逃渙率民兵防守民賴以安都御史楊信民聞而嘉之薦陞廣東按察司僉事卒于官

劉實字嘉秀安福人進士天順間由順天府治中擢南雄府知府剛介不阿一廉如水事持大體政尚簡靜暇則閉戶註春秋府為江廣要路往年商稅鉅萬公無所稽官于是者鮮不盈饜推其餘以待過客亦無或缺望實至存稅之一二繕郡學補路松而已未數月中貴使嶺外至南安先遣騎視供張不如昔所聞實又與騎抗禮不假借色詞騎馳還南安明日從中貴至入驛與諸從騎弓劍羅立左右邵僚廷叅畢遂出獨留實詰以慢已共苛辱之廷中轟然南雄民自驛門外爭走入為實謝過以身翼蔽遂以實出中貴見實得民心徐問知其平素欲召釋前憾實不復往中貴去至韶韶人為言南雄守驛書言公矣中貴乃亦以驛馬兼程疾馳先聞被逮至京入見具言從官三十年不以妻子隨餐粗衣敝欲為國家愛養所部不忍勞費之以是觸忤天使無所逃罪上霽威聽其言不復更窮治獄事得釋有日矣以病卒郡人哀而祀之祠曰忠義後改祀于景德祠至今韶人猶稱為鐵板劉詳見名臣錄

高瑤閩縣人景泰丙子鄉進士成化十九年任番禺知縣為政先風化而後簿書節財務義以身先之且廉公有威人自不犯縣左有倖臣所創寺僧不敢杵鍾倖臣問其故曰畏高正衙耳明日僧遂逃去倖臣亦撤鍾去之左布政使陳選稱曰古循吏不能過也瑤母生日選繪壽星圖為詩贈焉市舶太監常眷家人不法選盤出私貨諸司無敢收者瑤請曰願以身當之遂籍其財入庫權貴為之奪氣未幾眷誣奏選選被逮瑤亦落職束書數筴戴平頭巾飄然去士民

涕泣送之者幾千人今與陳公同祠祀云

周鐸字秉器萬安人正統壬戌進士歷官廣東右布政使與韓都御史征海寇有功時使司庫中有鉄籀木柱數十破之皆黃白金而籍無載者僚屬欲均利之鐸曰財屬庫藏可得而私邪悉聞之兩院時嘉其廉介稱方岳政績第一致仕歸清風肅然家居湫隘傍有僧舍當道欲以寺基益之鐸力辭焉歷官數十年其清慎始終如一日云

周孟中字時可廬陵人成化中進士授主事歷官廣

東左布政使凡征輸務寬大抑浮靡定婚娶節縮採  
珠官積與公府之繁費遇權璫不得居竒利威惠大  
行入覲吏部旌殊尤者六人孟中與焉懇疾丐歸  
以都察院右副都御史致仕居官所至以廉介稱  
張澄安福人弘治初歸善主簿攝長樂事日持糜蔬  
坐公署釐庶務弗懈樽節民財不遺餘慮歲少歉輒  
發粟以賑請不俟報期月而卒邑人哀慟爭執牲醴  
獻焉其女年甫及笄却之曰父在未嘗受饋今必不  
享惟取所執冬瓜為羹朝夕哭奠人嗟異之

林士元福州閩縣人由舉人嘉靖七年知香山縣事  
士元慈仁不擾撫愛小民每受訟牒怡聲與之細語  
盡庶得其情出言必由衷吏不忍欺士民以是親之  
久則如家人父子然一訊即吐露情實凡百樽節浮  
費庶靜不渝上下安焉初學宮在蓮峰山下日久廢  
壞科第缺人士元聞諸提學副使蕭鳴鳳相土定基  
撫按皆報可始遷入城中殿廡堂齋號舍悉有盡理  
所費約而易成諸生運有捷鄉書者士元毋老會當  
道巡至順德檄士元躬送案卷先諭意索賄士元執

不與乃謂人犯不至欲凌辱之士元奮衣起曰浚民膏脂以奉上寧死不忍為也竟不受辱而出即疏言母老乞改教職授潮州府學教授怡然就道卒為當道所尼僅遷周府審理不之官致仕而歸石簡字廉伯寧海人進士嘉靖十二年知高州府居官廉靜嚴毅人莫敢干以私尤篤於愛民嘗師事秦泉黃佐為學以反躬為本群三學生負延前編脩程文德與之講學捐已俸以給諸生燈油蒞任三載調安慶行李蕭然至廣州三水縣遇盜盡掠行囊止

俸銀九十兩名重當時官至巡撫雲南副都御史周啟祥字源伯別號南鶴浙之海寧人少遊邑庠每為文研精輒以指撚其髮髮落若禿人多笑之而公自如也隆慶丁卯舉于鄉而後娶戊辰連登甲第授刑部主事刑曹事簡諸僚率多為文酒交公獨坐署中講讀律例嘗語人曰居官須此猶儒生之須經書也掌部西石王公鑑川王公咸器重之每從咨決多所平反凡有奏請率多俞允為西曹之冠歲戊寅出守廣州政尚簡易以節愛為主謝絕餽遺不徇請託

即同年以子弟求送道試者亦嚴却之自奉儉約日惟  
蔬食或飢時遇公冗從袖中出數錢市麩餅一二啖  
之即不再食衙內或乏糧竟隱忍不敢輒以白公日坐皇堂  
視案牘剖詞訟悉從已斷吏胥不敢高下其手會布涌  
蠻民構譽煽亂軍門調兵征剿諸將率多擄良為功公  
建議只錄其生擒者全活甚衆庚辰入覲例有交際公  
稱貸以應鬻產以償壬午再應朝囊無餘物公靡所  
顧憲行至贛州疾劇而卒啓其笥僅以供飲計聞廣州  
士民各於寺觀為位哭臨復建祠祀之直指羅公允祀於府

學宦祠君子謂其清埒吳隱之云

外史氏槩曰夫詩咏羔羊大夫春秋美季文子  
蓋以大夫節儉正直足以風有位而季文子無  
衣帛之妾無食粟之馬無藏金玉君子是以知  
文子之忠也要之忠者廉之本未有忠而不廉  
者正直者節儉之本未有正直而不節儉者是  
廉所以成其為忠節儉乃所以成其為正直也  
然則當官者何可不尚廉節哉此表循良者必  
以清白為首也嶺海去京師萬里而述自漢以

下稱廉吏者代不乏人皆堂堂然百代之儀表  
若孟嘗吳隱之包拯楊長孺尤卓特名世者入我  
皇明褒崇廉節若王溥之責弟却衣邢昭之忍饑辭  
米道同之直節被逮楊渙之廉能蜚聲劉實一  
清如水而忠義有祠高瑤剛介不阿而角巾謝  
政周鐸廉著於居官啓祥清同於處默是誠一  
時之賢良而百司之型範也夫有定守者必由  
其有定見焉左傳襄公二年宋人或獻玉於子  
罕子罕辭之曰我以不貪為寶子以玉為寶若  
以與我皆喪寶也不若人有其寶漢楊震謂故  
舊曰使後世稱為清白吏子孫以此遺之不亦  
厚乎夫知子罕之所寶又知楊伯起之所遺則  
清白有關於世道不淺爰次而著之詩曰凡百  
君子式穀是似來者其尚繹思焉

粵大記卷之十一

嶺南郭棐篤周甫編

宦蹟類

循良芳躅上

秦史 祿

漢羅弘 孫豹 何敞 錫光

任延 衛蠡 茨克 僮尹

楊扶 許荆 周敞 周憬

賈琮 周乘 陸康 熊喬

粵大記 卷之十一



吳李肅 鍾離牧 聶友

晉羊衢 吳展 諸葛京

南宋陸法真 梁王琳 胡穎

唐張玄素 常袞 鄭從謹 蔣防

崔珙

宋周渭 凌策 馮拯 查陶

郎簡 張岐 常九思 張昱之

林積 袁抗 蕭世京 連希覺

詹範 羅守成 蘇伯材 范處厚

林勲 陳橐 蘇洸 林一鳴

黃公度 何庚 黃洧 留正

胡衍 戴之邵 許巽 陳峴

傅大聲 鄒非熊 方信孺 岳霖

宋煜 蕭麟 徐應龍 何坦

陳千齡 丁允元 陳穎 林燾

梁克俊 顏橐 李華 許巨川

冷應徵 洪天錫 許應龍 洪天驥

孫叔謹 薛直夫 鄭良臣 陳圭

方大琮 李迪 劉克莊 梁益謙

王亘 黃歲 師顯行 陳塏

牟滂 胡穎

史祿者秦始皇時以史監郡其後遂為史姓也始皇  
伐百粵使尉屠睢發卒五十萬為五軍祿轉餉鑿渠  
通糧道自海陽山導水源以湘水北入于楚融江為  
牂牁下流南入于海遠難利涉乃為磯以激水於沙

礪中壘石作鑿泝湘之流而注之融激行六十里置  
陡門三十六使水積漸進故能循厓而上建甌而下  
既通舟楫又利灌溉號為靈渠及漢馬援征徵側繼  
疏之以濟師徒引饋運民至于今賴之者祿之功也  
羅弘荊州長沙人也元封五年初置交趾部刺史秩  
六百石掌奉詔條察州多以海隅荒遠行部罕徧征  
和中弘為刺史始發蒼梧春征冬息咨詢疾苦太守  
墨暴者多解黃綬肉袒請罪所至繕緝城社番禺都  
內尉佗有南武城其北越王山路井陌連磴相傳為

弘所闢云  
孫豹會稽人父辛武帝末為珠崖太守調廣幅布獻  
之蠻不堪役遂攻郡殺幸於是豹合率善人還復破  
之自領郡事討擊餘黨連年乃平豹遣使封還印綬  
上書言狀制詔即以豹為珠崖太守威政太行獻命  
歲至時稱其賢

何敞九江人元始中為交趾刺史行部到梧郡高要  
縣暮宿鵠奔亭夜猶未半有一女子從墮下出自言  
妾性蘇名娥字始珠廣信縣脩里人

兄弟夫亦久亡有雜繒百二十匹及婢一人名致富  
孤窮羸弱不能自振欲往傍縣賣繒就同縣人王伯  
賃車牛一乘與錢萬三千載妾并繒令致富執轡以  
前年四月十日到此亭外于時已暮行人既絕不敢  
前行因即留止致富暴得腹痛妾往亭長舍乞漿取  
火亭長龔壽操刀持戟來至車傍問妾曰夫人從何  
所來車上何載丈夫安在何故獨行妾應之曰何勞  
問之壽因捉妾臂欲汗妾不從壽即以刀刺脅妾立  
死又殺致富壽掘樓下埋妾并婢取財物去殺牛燒

車杠及牛骨投亭東空井中妾死痛酷無所告訴故  
來告於明使君敞曰今欲發汝屍骸以何為驗女子  
曰妾上下皆着白衣青絲履猶未朽也掘之果然敞  
乃遣吏捕壽拷問具服下廣信縣驗問與娥語同收  
壽父母兄弟皆繫獄敞表壽殺人於常律不至族誅  
但壽為惡隱密經年王法所不能得鬼神告訴千載  
無一請皆斬之以助陰誅上報聽之

錫光漢中人平帝時為交趾太守教道民夷漸以禮  
義越俗婚娶無法光約以年齒相配民始正夫婦之  
倫教化大行後有任延者政聲侔於光嶺南華風始  
於二守焉

任延字長孫南陽宛人年十二為諸生學於長安號  
稱聖童建武中為九真太守九真俗以射獵為業不  
知牛耕民常告糴交趾每致困乏延教令鑄作農器  
墾開田疇百姓克給駱越之民婚娶無禮法不識父  
子之性夫婦之道延移書屬縣使男年二十至五十  
女年十五至四十皆以年齒相配其貧無禮聘者令  
長吏以下各省俸祿以賑助之同時相娶者二千餘

人其產子者始知種姓咸曰使我有是子者任君也  
多名子為任九真人生為立祠永平二年徵拜河內  
太守九年病卒

衛颯字子彥河內脩武人也家貧好學問隨師無糧  
常傭以自給王莽時任郡歷州宰建武二年辟大司  
徒鄧禹府舉能案劇除侍御史襄城令政有名迹遷  
桂陽太守郡與交州接境頗染其俗不知禮則颯下  
車脩庠序之教設婚姻之禮暮年間邦俗從化先是  
滄淮瀆陽曲江三縣越之故地武帝平之內屬桂陽

民居深山溪谷習其風土不出田租去郡遠者或且  
千里吏事往來輒發民乘船名曰傳役每一吏出徭  
及數家百姓苦之颯乃鑿山通道五百餘里列亭傳  
置郵驛於是役省勞息姦吏杜絕流民稍還漸成聚  
邑使輸租賦同之平民又耒陽縣出鐵石佗郡民庶  
常依因聚會私為冶鑄遂招來亡命多致姦盜颯乃  
上啓鐵官罷斥私鑄歲所增入五百餘萬颯理卹民  
事居官如家其所施政莫不合於物宜視事十年郡  
內清理嘗約史記要言以類相從為史要十卷南土

莫不傳誦二十五年徵還先武歆以為少府會颯被  
疾不能拜起勅以桂陽太守歸家須後詔書居二歲  
載病詣闕自陳困篤乃收印綬賜錢十萬後卒  
于家

茨克字子河南陽宛人也初舉孝廉之京師同侶馬  
死克到前亭輒舍車持馬還相迎鄉里號之曰一馬  
兩車茨子河建武中代颯守桂陽亦善其政民懶惰  
少躡履皆徒跣盛寒時足多剖裂春温或至膿潰克  
教之編織麻草作屨不知耕稼克教民種植桑柘麻  
紵之屬勸令蠶織示以採桑飼眠之法民得利益至  
今嶺南知桑蠶織屨之方皆克之化也後廟食于連  
州

僮尹丹陽人舉孝廉為郎需次京師永平十七年春  
二月僂耳慕義貢獻其夷詭異生則鏤其頰皮連耳  
匡分為數支狀如鷄腸纍纍下垂渠帥貴長耳皆穿  
而縋之垂肩三寸見者詫為異物不敢正視是時其  
露頻降樹枝內附公卿百官皆以為祥瑞顯應徵在  
遠人乃集朝堂稱觴上壽適張純子奮襲武始侯來

朝亦與焉尹從奮引見便殿應對合旨顯宗竒尹才  
美因拜尹儋太守尹至郡敷政未久下詔擢為交趾  
刺史還至珠崖戒勅官吏毋貪珍賂勸諭其民毋鑿  
面頰以自別於洞俚雕題之俗自是日變建初中以  
尹能匡俗信民厚加賞賜遷武陵太守

揚扶字聖儀會稽烏傷人也曾大父茂家本河東從  
光武征伐為威寇將軍封新陽縣侯建武中就國烏  
傷傳封二世有罪國除因而家焉和帝永元中扶以  
薦辟為武源令遷交趾刺史有理能名洞民有群入

人家奪飲食者其家與之格鬪黨與畢集因行劫掠  
督郵徃捕反為所傷後乃益兵始就縛扶謂曰汝第  
飢爾叱使就粟南海即吏盡諍以為縱惡不可扶笑  
遣之行二日盡投江中聞者大驚有瞽嫗市物泉刀  
盡失訟諸扶扶密遣人訶得所遺予嫗嫗感泣而去  
凡行部所至有恩惠州人為之謠曰揚聖儀政多竒  
蓋此類也

許荆字少張會稽陽羨人也祖父武嘗推家財與其  
二弟郡中稱友官長樂少府荆少為郡掾亦嘗極兄

子世於難人皆賢之太守黃毓舉孝廉和帝時稍遷  
桂陽太守郡濱南州風俗脆薄不識學義荆為設喪  
紀婚姻制度使知禮禁有兄弟爭財互訟者對之嘆  
曰吾荷國重任而教化不行咎在太守顧使吏上書  
陳狀欲詣廷尉兄弟感悔各求受罪諸不養父母兄  
弟分析因此皆還供養者千餘人

周敞汝南人舉孝廉順帝永和中為交趾太守請  
立為州朝議不許即拜敞交趾刺史懷柔民夷甚有  
威惠自鄧讓以七郡歸附後寇賊時發敞能勞未勞  
集海寇不敢犯境嘗行部至龍川聞山木響異因伐  
取其中以為鼓以下分鼓給桂林郡上分鼓給交趾  
郡擊一鼓則二鼓皆鳴俚獠相警動謂有龍潛而密  
應莫不畏之因名其山曰龍山敞辟同郡陳茂為別  
駕從事並有奇績比遷豫州刺史與茂俱行到潁川  
陽翟傳傳中有置美酒一桮敞去勅御騾載酒以行  
茂見即取桮擊柱破之敞問茂曰刺史年老須酒益  
氣別駕破桮名亦何益茂答曰所過皆有以明使君  
傳車駢駮載酒非宜也敞敬謝之親茂愈於交初



周憬字君光徐州下邳人桓帝時舉孝廉拜尚書侍郎遷固始相遂拜桂陽太守樂昌縣西一百十八里為武溪溪上驚湍激石流數百里昔馬援南征其門人轅寄生善吹笛援為作歌紀之名曰武溪深其辭曰滔滔武溪一何深鳥飛不渡獸不能臨嗟哉武溪何毒淫憬至郡乃命良吏督帥壯夫挑移盤石投之窮壑夷高填下鑿截回曲弼水之邪性順導其經脉礮磕既斷洶湧勢弱由是小溪盡平大道克通舟人安流行旅皆頌出其塗矣六瀧既奠流合武水憬之功也熹平三年曲江為立廟刻碑于瀧頭瀧口一處至今民頌其功不衰

賈琮字孟堅東郡聊城人也舉孝廉再遷為京兆令有政理迹舊交趾土多琮產前後刺史率多無清行上承權貴下積私賂財計盈給輒復求見遷代故吏民怨叛中平元年交趾屯兵反執刺史及合浦太守來達自稱柱天將軍靈帝特勅三府精選能吏有司薦琮為交趾刺史琮到部訊其反狀咸言賦歛過重告寃無所民不聊生聚為盜賊琮即移書告示招撫

荒散蠲復徭役誅斬渠帥為大害者簡選良吏試守  
諸縣歲間蕩定百姓以安巷路為之歌曰賈父來晚  
使我先反今見清平吏不敢飯琮却琛獻守令亦皆  
不敢受在事三年為十三州最徵拜議郎後為度遼  
將軍卒於官

周乘字子居汝南安城人天資聰朗高峙岳立非陳  
蕃黃憲之徒則不交也中平初與憲及封祈等六人  
以孝廉為太守李張所舉函封未發而張病卒張夫  
人於柩側下帷見六孝廉守喪不去謂曰諸君各懷  
進退俱未肯發妾幸有三孤足理喪紀正使相隨墳  
陌何若曜德王室亡者有靈實寵賴之沒而不朽此  
其然乎乘哭盡哀與鄭伯堅即日辭行詣京師拜郎  
中遷鄢陵長建安中被徵拜侍御史公車司馬令不  
畏強禦以是見怨於幸臣出為交趾刺史上書云南  
交絕域習于貪濁強宗聚奸長吏肆狡侵漁萬民貽  
毒久矣今為聖朝掃清一方是時屬城解綬者三十  
餘人嶺表為之肅然陳蕃嘗歎曰若周子居者真治  
國之器譬諸寶劍則世之干將後遷太山太守甚有

惠政民信服之卒于官

陸康字季寧吳郡人也少篤孝悌勤脩操行博通象數刺史臧旻舉茂才除高成令有能理名光和元年遷武陵太守轉守桂陽歷任以恩信為治寇盜亦息又改樂安郡所在稱之後以直言免官歸田里復徵拜議郎會廬江賊起出康為廬江太守擊破降之獻帝即位天下大亂為孫策所攻受敵二年城陷月餘發病臨終屈指庚子歲天下鼎分謂少子績曰從今以後六十年車同軌書同文至太康元年晉果平

吳績字公紀即幼年曾謁袁術懷橘墮地以歸遺母者也後為鬱林太守亦博學善政見稱當時滿歸舟輕取石為裝人目為廉石自知亡日蓋得父傳云熊喬字伯舉春陵人少治歐陽尚書以經學顯名初平中被辟至東都京兆尹陳龜推擇為桂陽郡曲江長雍容泣事往惡不咎聽覽如流海竭懷惠夙稟英俊俊序以禮範郎吏督郵陰邪臧迹會董卓作難劉表為荊州牧選拜綏民校尉籌畫畢張諤諤在密出郭值雨見緇負者使護跌隧仁聲益隆居五年去官未

幾詔拜騎都尉灌陽長膏澤再施徽音嗣聞建安二十一年卒

李肅字偉恭南陽人少以才聞善論議臧否得中甄竒錄異薦述後進題目品藻曲有條貫衆人以此服之權擢以司選舉號為得才求出補吏為桂陽太守分郴以北為北部始興以南為南部隨俗而治吏民悅服會卒知與不知並痛惜焉

鍾離牧字子幹會稽山陰人吳大帝赤烏五年遷南海太守時高涼賊帥仍弩等破略殘害越界撲討旬

日降服又揭陽賊帥曾夏等數千人歷十餘年以侯爵雜繒千匹下書購募不可得牧遣使慰譬皆首服自改為良民始興太守羊衢與太常滕胤書曰鍾離子幹吾昔知之不熟今見其在南海威恩部伍智勇分明加以操行清純有古人之風其見貴如此在郡四年以疾去

聶友字文悌豫章人也少以才譖錄為縣吏虞翻徙交州縣令使友送之翻與語而竒焉為書與豫章太守陳斐令以為功曹斐遂用之至都諸葛恪遂與友

善初孫權將圖珠崖以問軍師全琮琮曰以聖朝之  
威何向不克然殊方異域隔絕瘴海水土氣毒自古  
有之兵入民出必生疾病轉相汚染往者懼不能反  
所獲何可多致猥虧江岸之兵以冀萬一之利愚臣  
竊所不安權不聽恪薦友為珠崖太守詔加友將軍  
與校尉陸凱同往執馘奏捷留友治之友慮師久致  
疫簡其精銳自衛餘先遣還權大詭徵守丹陽

羊徽南陽人受知孫權初為中庶子侍中胡綜作賓

之月曰英才卓越超踰倫匹則諸葛恪精識時機達

幽究微則顧譚凝辨宏達言能釋結則謝景究學甄  
微游夏同科則范慎徽乃私於綜曰元遜才而疏子  
嘿精而狠叔發辯而浮孝敬深而狹所言皆有指趣  
後四人皆敗吳人謂徽言有徵赤烏二年春為使者  
督軍擊魏有功廖式作亂既平以徽為桂陽太守孫  
皓甘露元年分桂陽南部為始興郡改徽為始興太  
守徽益研政術南嶠率服藻鑑人物卒無一爽人皆  
敬之

吳展字士季下邳人篤學慎行為鄉里所重州舉孝

廉仕至廣州刺史為政清平著聲南嶠秀才蔡洪稱其忠足矯非清足厲俗信可結神才堪幹世被徵而去後為吳郡太守吳平還下邳閉門自守不交賓客誠聖世之老成明時之雋乂也言于刺史周俊欲其薦展展竟不出

諸葛京字行宗瑯琊陽都人亮之孫瞻之次子也魏人滅漢瞻戰死咸熙初徙其家河東晉武帝泰始中詔曰諸葛亮在蜀盡其心力其子瞻臨難而死義天下之善一也其孫京隨才署吏後為郿令尚書僕射

山濤啓薦之尋擢中庶子惠帝時位至平越中郎將廣州刺史假節推誠待物有祖風烈吏民稱之

陸法真吳郡人宋孝武時歷官有清節嘗為劉秀之安北錄事參軍羊希與孫詵書曰足下同僚陸錄事東南名士又張玄外孫持身至清年高官下秉操不衰當日夕相與申意明帝初為南海太守時廣州部將李萬周以南江督護之兵作逆殺刺史袁曇遠將有異圖法真保鄣民庶鎮靜不擾郡境賴之竟以勞悴卒于官

梁王琳字子珩會稽山陰人本兵家元帝居藩琳姊  
妹兼入後庭見幸琳由此未弱冠得在左右少好武  
遂為將帥後拜湘州刺史使拒武陵王紀紀平授衡  
州刺史元帝性多忌以琳所部甚盛又得衆心故出  
之嶺外又授都督廣州刺史其友人主書李膺帝所  
任遇琳告之曰琳蒙拔擢常欲畢命以報國恩今天  
下未平遷琳嶺外如有萬一不虞安得琳力忖官正  
疑琳耳琳分望有限可得與官爭為帝計何不以琳  
為雍州刺史使鎮武寧琳自放兵作田為國捍禦若  
警急動靜相知孰若遠棄嶺南相去萬里一日有變  
將欲如何琳非願長坐荆南政以國計如比耳膺然  
其言而不敢啓遂率其衆鎮嶺南元帝為魏圍逼乃  
徵琳赴援除湘州刺史

胡穎字方秀吳興東遷人偉姿容性寬厚梁世仕至  
武陵國侍郎東宮直前出番禺征討俚洞廣州西江  
督護陳霸先在廣州穎仍自結托霸先與其同郡接  
遇甚隆及南征交趾穎從行役餘諸將帥皆出其下  
及平李贲武帝旋師穎隸在西江出兵多以穎留守

侯景之亂霸先克元景仲及度嶺援臺平蔡路養李  
遷仕穎皆有功歷平固遂興二縣令承聖初元帝授  
穎假節驃騎將軍羅州刺史封漢陽縣侯邑五百戶  
張玄素蒲州虞鄉人少為吏有清名事太宗拜侍御  
史遷給事中貞觀四年詔發卒治洛陽宮乾陽殿且  
東幸上書極諫即詔罷役賜綵二百匹魏徵謂論事  
有回天之力歷太子少詹事遷右庶子時太子承乾  
事游畋不悅學玄素累諫不納太子怒遣刺客伺之  
會被廢玄素坐除名為民頃之召授潮州刺史玄素  
不鄙夷遠民間命即就道履任撫摩困窮興建學校  
悉心以勤民事既而徙鄧州高宗時以老致仕麟德  
初卒

常袞京兆人天寶末進士及第性狷潔不妄交游由  
太子正字歷中書侍郎同門下平章事以事貶潮州  
刺史袞自惠入潮人名所駐岡為丞相嶺捐貲墾田  
以供羅浮游士涖州興學教士潮俗為之丕變士類  
尊敬之曰此劾中人不當濫汙師席者也爭傳誦其  
文字然頗苛細以清儉自賢建中初楊炎輔政起為



福建觀察使閩人由袞知學卒于官年五十五贈尚書左僕射

鄭從謹字正求宰相餘慶之孫也會昌二年進士及第累官宣武軍觀察等使暮年報政美聲流聞當途者懼其大用改廣州刺史嶺南節度使五管為南韶蠻所擾而林邑又復內侵召天下兵進援會龐勛作亂不暇邊事從謹在鎮北兵寡弱夷獠肆然乃募土豪署其苗以右職而約束之禦侮扞城皆得其効雖郡邑屢陷而交廣晏然後謹以久在番禺不樂風土息歸戀闕形於賦詠累上章求為分司散秩不許僖宗立召為刑部尚書久之以本官同平章事後進太傅兼侍中致仕謚文忠

蔣防字子微淮南人登進士上第以文章擅名元和中為尚書司封郎中知制誥翰林學士出刺汀州于敖封還詔書因措紳意伸其枉曰于給事犯宰執之怒申龐蔣之屈不亦善乎奏下改防知連州嘗疏楞伽峽水以利涉民甚德之

崔珙博陵安平人父刺史頊有八子皆顯庸人比之

漢荀氏八龍珙以書判拔萃高等官至太府卿太和  
七年正月拜廣州刺史兼嶺南節度使延英中謝帝  
問以撫理南海之宜珙奉對明辯帝深嘉之授珙檢  
討工部尚書徐州刺史武宗即位拜同中書門下平  
章事素與崔鉉不協鉉言珙妄破鹽鐵錢又嘗保護  
劉從諫會昌四年六月坐貶恩州司馬在恩踰歲清  
苦自持寬和得衆心嘗往州西登眺人名其岡曰丞  
相嶺云宣宗即位以赦召還為太子賓客鳳翔節度  
使乞致仕卒

周渭字得臣昭州恭城人幼孤養于諸父力學工為  
詩劉鋹據五嶺昭州皆其地也政繁賦重民不聊生  
渭率鄉人六百踰嶺將避地零陵未至賊起斷道絕  
糧復還恭城則廬舍煨燼遂奔道州為盜所襲渭脫  
身上建隆初至京師為薛居正所禮上書言時務  
召試賜同進士出身解褐白馬主簿縣大吏犯法渭  
即斬之上奇其才擢右贊善大夫太平興國二年為  
廣南諸州轉運副使初渭之入中原妻子留恭城開  
寶三年平廣南詔昭州訪求賜錢米存卹之及是渭

始還故里鄉人以為榮渭奏去劉鋹時稅筭之繁者  
重定田賦興學校遷殿中丞屬有事交趾主將逗遛  
無功有二敗卒探甲先至邕州市奪民錢渭捕斬之  
後至者悉令解甲以入訖無敢犯移書交趾諭朝廷  
威信將刻日再舉黎桓懼則遣使入貢就加監察御  
史在嶺南凡六年徙知揚州進殿中侍御史改兩浙  
東西路轉運使入為監鐵判官遷侍御史益州轉運  
使坐從子遠詔市馬黥為彰信軍節度副使咸平二  
年真宗聞其清節召還將復用詔下而卒年七十七

上閔其貧不克贖錢十萬以其子建中為乘氏主簿  
渭妻莫荃賢婦人也渭北去時不暇與荃訣二子孩  
幼荃尚少父母欲嫁之荃泣誓曰渭非久困也今遠  
難遠適必能自奮於是親蠶績碓舂以給朝夕二子  
皆畢婚娶凡二十六年復見渭時人異之朱昂著吳  
節婦傳紀其事

凌策字子奇宣州涇人世給事州縣策幼孤獨厲志  
好學宗族初不加禮因決意渡江與姚鉉同學於廬  
州雍熙二年舉進士起家廣安軍判官廣南西路轉

運使進屯田負外郎入為戶部判官遷都官先是嶺南輸香藥以郵置卒萬人分舖二百負擔抵京師時以煩役為患詔策規制之策請陸運至南安汎舟而北止役卒八百大省轉送之費盧之翰刺廣州無廉稱以策有幹名拜職方負外郎直史館命代之賜金紫廣英路自吉河趣板步二百里當盛夏時瘴起行旋死者十八九策請由英州大源洞伐山開道直抵曲江人以為便代還知青州

馮拯字道濟河陽人少以書生謁趙普普奇其狀曰子富貴壽考宜不下我舉進士補大理評事淳化中有上封立皇太子者拯與尹黃裳王世則洪湛伏閣請立許王元禧太宗怒悉貶嶺外拯知端州既至上言請遣使括諸路隱丁更制版籍及議塩法通商十餘事太宗欲召還參知政事不果乃徙知鼎州改通判廣州郊祀遇覃恩遷尚書負外郎真宗時以吏部尚書檢校太傅同平章事乾興初進封魏國公卒贈太師中書令謚文懿子行已伸已皆知名

查陶字大鈞徽州休寧人初仕南唐以明灋登科補

常州錄事參軍太宗時知南雄州事地當衝要民雜夷夏陶至風俗丕變成平中遷秘書少監後代楊億知審刑院景德三年卒子拱之進士職方郎中慶之太子中舍人

郎簡字叔廉杭州臨安人幼孤貧借書錄之多至成誦進士及第補試秘書省校書郎知賓州縣吏死子幼贅婚偽為券冒有其貲及子長屢訴不得直乃訟于朝下簡劾治簡示以舊牘曰此爾翁書耶曰然又取偽券示之弗類也始伏罪累遷尚書度支員外郎廣南東路轉運使擢秘書少監知廣州捕斬賊馮佐臣入判大理寺以尚書工部侍郎致仕祀明堂遷刑部卒年八十有九特贈吏部侍郎

張岐字邵鄉崇安人真宗朝以秘書丞知瓊州瓊俗悍朴牧守御得其道則歲時以香蠟魚果為獻否則群起為盜岐鎮以清靜卻餽獻民夷服其廉介其地多颶風能拔屋盛夏猶寒岐教以立屋之法稍免其患後倅曹州移瀛州

常九思河內人仁宗時知韶州心樂易而政精勤先

是郡歲課丁夫刺船南海餽鹽數千萬石民重困擾  
獄訟益煩九思下車斥占名之卒以代之民得休息  
其後有樂温故知韶州日漕司欲以徭寇首豪挿住  
州境温故拒不受民乃安堵罷三溪鹽場并草墟歲  
額在職二年市銅鑄錢三十萬貫待後累表薦之又  
其後有王之才知韶州樂善好脩敏而有才雖韶稱  
事劇而日有餘暇嘗新州學日與弟子負討論講解  
崇獎秀異俾之進業三人者皆以能理名

張昱之字景山清河人進士及第仁宗時累官至廣  
南東路轉運使夷人有犯其酋長得自治而多慘酷  
昱之一以漢法從事王絲紹興人慶曆中以侍御史為  
廣南東路轉運使兼市舶提舉舊番舶之來十稅其  
一必擇精者絲令精粗兼取夷人悅之目為金珠御  
史二人前後所尚不同昱之繩之以嚴絲稅之以寬  
然夷情亦莫不服

林積字公濟龍溪人也慶曆中循州判官廉謹方嚴  
嘗覆強盜獄多平反忤部使者意初使者欲薦積因  
是已之積笑曰失一薦章而活五十八人吾何憾焉

改治安福六合皆有政績繼至泗州調對神宗嘉其  
廉能除江西運判徙廣東提刑召為三司度支判官  
遷駕部郎中太府少卿出知福州移河南轉運使卒  
袁抗字立之洪州南昌人舉進士得同學究出身累  
遷國子博士知南安軍擢提點廣南東路刑獄浙東  
叛卒鄂鄰寇閩越轉南海與廣州兵逆戰海中值大  
風有告鄰溺死者抗獨曰是日風勢趣占城鄰未必  
死後果得鄰於占城還為度支三司判官改少府監  
卒抗喜藏書至萬卷江西士大夫家鮮及也抗子陟  
少刻勵好學善為詩終殿中丞

蕭世京字昌孺江西龍泉人嘉祐丁酉進士歷官廣  
東路提舉常平公事時蔡京當國世京多與相忤論  
列京十事京怒罷歸會徽宗於禁中得世京所上書  
即擢為吏部員外郎遷廣東路轉運副使賜金紫有  
番商蒲缺者多蓄珍貨與吏通賄因負勢橫甚世京  
按其罪治之時江陵令孫暈者通敏有幹局會黎人  
寇瓊州以師出討辟暈偕行暈請單車入壘降之後  
知雷州平劇寇累陞朝請大夫致仕卒

連希覺字民先不知何許人紹聖二年知英州時南山有梁勝果寺遺基前守建衆樂亭與民同遊希覺繼至記其成發明先憂之義人爭誦之已而罹艱憂去崇寧初復知南雄州伐石築陂引水灌田民感其惠號曰連陂至今賴之

詹範字器之崇安人紹聖間知惠州蘇軾謫居範載酒從遊相與倡和時兵荒之後野多暴骨範取而掩之為義塚焉故軾詩曰江干白骨已銜恩又嘗稱其治行類龔渤海云

羅守成紹聖中知廉州愛民禮士百廢具舉築城壘創貢闈賑貧人施藥劑力可到處靡不盡心郡人立祠祀焉又有謝季成元祐中以南京作坊來知廉州版築城壁脩治道路庠序一新

蘇伯材字延構晉江人紹聖四年第進士知潮州潮陽縣富民殺其姪女有吏密懷黃金數百兩置于前且白其事伯材械治之事連縣佐部使者以聞詔褒其能知韶州憲吏執翁源平民為賊以幸賞賂縣令梁格使獄死伯材廉知事狀以聞于朝格坐黥海島



有文集周易解義三十卷藏于家

范處厚紹興人崇寧五年知南雄州大觀初詔製孝弟睦婣任卹忠和八行之選每路以三人為率詔下二年嶺南一十五郡無應選者處厚悉心搜訪得譚煥歐陽珪許牧三人以其行聞為一路殊選

林勳賀州人政和五年進士為廣州教授建炎三年八月獻本政書十三篇言國家兵農之政率因唐末之故今農貧而多失職兵驕而不可用是以饑民竄卒類為盜賊宜假古井田之制使民一夫占田五十

畝其有羨田之家毋得市田其無田與游惰末作者皆驅之使為隸農以耕田之羨者而雜紐錢穀以為十一之稅宋二稅之數視唐增至七倍今本政之制每十六夫為一井提封百里為三千四百井率稅米五萬一千斛錢萬二千緡每井賦二兵馬一匹率為兵六千四百人馬三千四百匹歲取五之一以為上番之額以給征役無事則又分為四番以直官衛以給守衛是民凡三十五年而役使一遍也悉上則歲食米萬九千餘斛錢三千六百餘緡無事則減四分

之三皆以一同之租稅供之匹婦之貢絹三尺綿一  
兩百里之縣歲收絹四千餘疋綿三千四百斤非蠶  
鄉則布六尺麻二兩所收視絹綿率倍之行之十年  
則民之口筭官之酒酤與凡茶鹽香礬之權皆可弛  
以予民其說甚備書奏以勲為桂州節度掌書記朱  
熹甚愛其書東陽陳亮曰勲為此書考古驗今思慮  
周密可謂勤矣世之為井地之學者孰有加於勲者  
乎要必有英雄特起之君用於一變之後成順致利  
則民不駭而可以善其後矣

陳橐字德應紹興餘姚人入太學有聲登政和上舍  
第累遷權刑部侍郎除徽猷閣待制廣州兵興後廣  
東盜賊無寧歲十年九易牧守橐盡革弊政以恩先  
之留鎮三年民夷悅服初朝廷移韓京一軍屯循州  
會郴寇駱科犯廣西詔遣京討之橐奏廣東累年困  
於寇賊自京移屯敵稍知畏今悉軍赴廣西則廣東  
危矣檜以橐為京地坐稽留機事降秩屢上章告老  
改婺州請不已遂致事又十二年以疾卒于家年六  
十六橐博學剛介不事產業先世田廬悉推予兄弟

在廣積年四方聘幣一不入私室既謝事歸剡中僑  
寓僧寺日糴以食處之泰然王十朋為風土賦論近  
世會稽人物曰杜祁公之後有陳德應云

蘇洵字澄老父欽自泉之德化遷仙遊官至利州路  
轉運判官洵以父任入官知臨川縣脩治述陂民號  
蘇公陂通判賓州時張栻為帥以廉吏舉除知雷州  
秩滿赴闕而陳三劄一乞折納徐聞丁米以便民二  
乞籍海舟以戢姦盜三乞戒約廣西軍寨不得差入  
貿易改知新州民有何世春之歌移封州洵首請咸  
丁米及經制無額之數所至人皆德之

林一鳴字聞卿莆田人以父正蔭補官梁克家當國  
起知南雄州改知惠州請發常平倉賑糶饑民奏罷  
賣口食塩淹造塩鈔紙官酷為民病者十數事又為  
文諭民力學種麥墾荒田脩坡塘去喪樂禁殺牛等  
事居民有殺牛方揮刃間牛掣斷繫奔至廳下若有  
所訴見者驚異一鳴命飼牛為治其屠人以為仁化  
所及官滿之日惟圖書數篋而已

黃公度字師憲莆田人紹興八年進士第一人十五

年通判肇慶府攝南恩守治事之餘以讀書著文為樂嘗題隆蔭堂詩云簿書休吏早花塢向人閑又增學廩擇秀民與之登降揖遜學者用勸邦人像而祠之及召還詢以嶺外弊事公度曰廣東小郡有十年不除守臣者權官苟且郡政廢弛民受其弊高宗曰君歸吏部當無此弊遂以公度為考功員外郎終左朝請郎所著有漢書鐫誤及知稼集等書行世

何庚春陵人以紹興二十六年知雷州急於民隱常以興利除害為公東洋田舊無陂塘畝澮以資灌溉庚相地宜鑿渠北導特呂塘之水使之南下西導西湖之水使之東注合二水灌田數千頃公私獲利名其渠為何公渠民到于今思之

黃洧字清臣甌寧人以父蔭除知南雄州郡小用度不饒舊常法外重贖以取資且榷酒酤增稅柵民告病矣而官用猶不足洧至一切罷之人以便安而郡亦未嘗乏事也州故與建饒贛州代輸坑冶司歲貢白金各若干兩故事皆取於民以辦公請以郡大小為差認悉蠲之郡人賴焉乾道四年改廣南東路提

舉市舶帥守市賈胡香不償直洧舉法移州帥愧且  
懼亟召歸之更為轉運判官廣學租禮名士益勸諸  
生以學番禺令近在帥守諸司治所肆意為姦無案  
舉者洧素聞之至是誨厲之不能改乃捕其吏屬劾  
之反而獄且奏上閱實抵罪以去其餘不循法度以  
病民者隨罪大小以次繩治於是各路肅然官吏始  
知有法守矣市人困於官估丐奪之擾洧為移書一  
路罷官估除市籍百貫得職物價為平復上奏請均  
其法於諸路詔施行之丁籍久失開收口賦之逋均  
及鄰伍流亡日衆洧選吏分行覈其實而除之一路  
所蠲凡十有五萬口流冗浸復瀕海蛋戶數萬生理  
至微亦有役於州縣洧悉免之按行所部雖煙瘴荒  
遠無所憚訪問疾苦伸理冤抑不可勝計革外銓匿  
闕循私之弊人無怨言江浙歲饑有旨發二廣義倉  
米航海詣永嘉往時嘗有此役吏並緣以擾民而米  
不時達洧處之有方且并西道所發轉致之不越月  
而至永嘉者八萬斛永嘉人焚香迎拜步下曰此廣  
東運使活我也史正志為發運使專以括取諸道羨

錢為已功諸道承風聽命不暇洎曰嶺外貧薄安得  
視它路財予緡錢千數正志怒歆陷洎為人告者乃  
已改使荆湖南路積官朝散郎卒朱熹銘其墓云  
留正字仲志泉州永春人紹興庚辰進士為南恩州  
陽江尉清海軍節度判官龔茂良守番禺器其材薦  
于宰相虞允文竒之擢知循州陞辭首言崇尚名節  
孝宗嘉之留為軍器監簿累遷中書舍人屢封還詞  
頭言忤時相以顯謨閣直學士出知紹興府後為四  
川制置使以擒羌酋奴兒結功除簽書樞密院叅議

政事右丞相封衛國公進封魏國公少師卒年七十

八贈太師謚忠宣有詩文奏議二十卷子恭丙筠碩

孫元英元剛皆仕顯于時

胡衍字昭叔秦和人擢進士第任保昌簿移高要尉  
獲偽造符者格當賞衍曰殺人得賞非吾願也力辭  
之遷滇陽令時嶺南無田之民例輸身丁米衍為言  
於臺部使者以聞免之又疏白嶺南民患數事上嘉  
納焉衍性夷曠洞徹藏書萬卷所著有松陵集  
戴之邵廬陵人乾道六年知雷州先是何公鑿渠引

水而捍海隄岸崩弛無以禦鹹鹵之邵又沿海築堤  
建閘并浚二渠之湮塞者自是外無斥鹵之患內有  
灌溉之饒民享永利目其堤為戴公堤又遷郡序於  
海康縣西自書進學說以勉學者復懇南軒張栻為  
記以申詔之

許巽字少陽仙遊人以禮學魁鄉薦乾道五年進士  
調知惠州歸善縣尉有部民為盜者巽驗問非實不  
為理尉囊橐上下必歆成賞太守入其說廷詰巽巽  
曰行法在太守執法屬有司守不能強巽遂縱書之

嘗舉手加額曰生我者父母再生我者知縣終朝散  
大夫

陳峴字山甫温州平陽人少篤學工文辭淳熙丁未  
進士中博學宏辭科歷官有政聲以太中大夫集英  
殿修撰嘉定元年知廣州軍州事兼管內勸農使充  
廣南東路經畧安撫使馬步軍都總管先是邑民苦  
預借峴至蠲諸邑宿逋四萬六千緡免大禮歲助賞  
錢一萬四千緡罷諸場稅額最為民害者二千五百  
緡幕僚以舊額請峴以州賦代輸且奏于朝無得預

借民獲甦息廣學宮治城濠設閘門渚水以備不常  
閱歲百役並興勞費不憚時獠寇部界謀窺州城峴  
募勇敢軍日加訓練益為備城以南戶口繁夥舊無  
捍蔽乃築東西鴈翅城以翼之郡號多士貢額纔十  
三峴為請于朝嘉定三年增額為二十五帥廣三年  
政務寬簡民甚德之以功封永嘉郡開國子食邑五  
百戶嘗以政暇委州文學齊瓊監鹽倉季端仁編南  
海志凡都會名蹟堙遏弗彰者皆補書之成一方信  
史凡十二卷云

傅大聲字仲廣仙遊人淳熙中進士通判循州適寇  
起守稱疾大聲調發諸軍奮力鏖戰賊皆潰去未幾  
餘黨復猖獗諸司專委大聲督捕乃上禦賊數策漕  
使劉強學躋之頒行于廣東遂劾守不職以大聲攝  
州事尋奏為真闔城驩呼曰傅父爾留吾屬有依矣  
前數月郡固有老松數株日出紫氣如雲騰空而上  
及大聲拜守人以為德政所感守上日有例冊錢千  
緡却之郡倉米斛增大於舊大聲首較定之在循四  
年民樂其政相率立祠焉



鄒非熊字宗望宜黃人登淳熙中進士授樂昌尉獲  
強盜耻受賞修復石渠以溉田民有去思辟曲江令  
平反獄事活死囚十有二邑人刻石民有張九韶者  
被盜尉執平民煨煉誣服非熊力爭破械遣之居亡  
何真盜敗九韶失物咸在人服其明遷判邵州陞辭  
陳三事上嘉納官至廣東提刑自號竹巖持論勁為  
文典人甚服之

方信孺字孚若莆田人登進士初為番禺縣尉盜劫  
海賈方聚分鹵獲信孺捕之盜惶駭欲趨舟而信孺  
已使人負盜舟去矣乃悉縛盜不失一人嘉定元年  
擢通判肇慶承檄督捕雄韶尚寇諸臺辟知新州未  
上有旨令同廖德明措置收捕就知韶州時江湖屬  
邑多燬于賊惟韶境賴之晏然未幾赤水洞賊踰嶺  
信孺遣義士秦綱督帳下兵與戰斬其渠而綱亦殞  
于賊信孺復欲募勇敢搗賊巢既而朝廷用招降之  
說乃止轉知道州

岳霖相州人岳武穆王飛之次子淳熙三年任知欽  
州交趾入貢使者肆毀驛舍霖封劔示其都監曰若

不聳而行當以軍法相待交人畏之繕而後行  
宋煜字伯華莆田人淳熙間知循州嶺南諸郡黻舍  
率敝陋煜至即撤而新之循人士始自力于學州境  
舊多曠土煜令民墾耕奏蠲其租六年遂成沃壤初  
民以茅覆屋恒多火灾煜乃量戶高下貸以官錢又  
輟城兵之匠者陶者相其役民用安居以時還所貸  
無一人敢負者先是守將閱城多虛文煜按視必親  
月以為常陳崗盜發倉卒徵旁郡兵獨煜所遣皆素  
練督將倚賴之迄以殄賊尋改知惠州惠有蘇范二  
姓故武斷為奸利州縣莫能制煜卒窮致其罪豪猾  
喘息有富民抵辜援舊比請輸錢以贖煜曰是豈所  
以瘴惡示懲耶竟論如律又減重額刷逋戶剋虛籍  
以蘇積困惠人德之煜孫翊以廕補得官端平初通  
判廣州時崔與之為帥辟知循州父子相繼握州麾  
而政聲亦相埒時人頌之  
蕭麟字耕道廬陵人開禧乙丑進士授曲江簿以能  
遷仁化令多仁恕愛民歲旱民視苗萎死麟教以作  
轆轤水車遂得灌浸之法兄弟爭產相毆擊者召而

諭之曰失一田地尚可置至如兄弟豈可復得民感  
泣遷化有失牛者意其憐鱗曰暮夜不可知毋執狐  
疑傷爾善備數日果得牛於林中民病因決而供賦  
不倦為奏蠲之其以仁感人多此類二年卒民哭之  
哀復像而祀之

徐應龍字允叔建寧人淳熙二年第進士嘉定間知  
雷州為政寬厚愛民如子勸農興學雷人頌之知南  
恩州政清而嚴奸豪屏跡民歌曰生我父母在何許  
養我父母徐州主後累官至刑部尚書

何坦廣昌人淳熙十一年進士少貧好學提刑廣東  
杜絕請托洗冤澤民斷獄得情以廉平為嶺南首稱  
官至寶謨閣學士卒謚文定又有湯露者延平人復  
齊先生陳宓門人也宓守延平盡行朱子之化露得  
其傳言出人從時及教授韶州士多崇信權學謝升  
賢脩學未完露節縮經費繼之乃底于成

陳千齡泰和人性邁捷與兄九齡皆通易學九齡累  
舉官南海簿千齡為韶州曲江簿有潮陽令以軍事  
犯贓上司欲窮治之時司諫韓璜徼千齡推鞠援者

踵至多方饋以夜金一無所受至問得實還報言令  
以趣謝軍務得罪初非入已璜覆觀案牘信然全得  
末減璜喜千齡無他當路亦嘉其平恕尋陞虔州司  
法叅軍

丁允元字叔中常州人淳熙中以忠諫謫守于潮增  
置韓江西岸石洲四架以梁而屋其上民懷之名曰  
丁公橋撥田租三百六十五石于學以贍士今祀于  
名宦祠

陳穎字奇之泉州人以父蔭入官知海陽縣治以寬  
慈盡蠲無名之賦人號陳佛子俊知惠州妖覲嘯聚  
策日為變帥臣欲以兵捕之穎謂捕則堅其必死心  
不若撫之使定竟就招提舉廣東市舶卒

林鏢福州人慶元三年任知州愛民如子州有白丁  
錢逃亡者責累甲頭民甚苦之鏢奏免復置田以益  
學廩構濟川橋以便往來惠政甚多祀于名宦

梁克俊字叔明泉州人也嘉泰初知循州積公帑數  
千以脩城葺學循人以其有功于民祠於縣治其後  
同郡趙善諤子安之繼知循州勤恤民隱而除其害

易茅屋以庇民病涉則為之架梁凡可以為循利者靡不究心邦人德之為生立祠焉

顏擴字養正晉江人以太學生登開禧元年第歷南海令有惠政以考最通判循州知梅州贛寇陳三槍萬衆逼梅城四十二日擴激厲將士分隅拒守又合蜚船布水陣攢矢射之賊遁去帥垣上其功會病卒李華建寧建安人嘉定十一年為連州司法時楞伽峽崩水逆行城郭昏墊者數歲華力請于郡仍赴漕臺建議身任疏鑿之責三載峽底于平既滿去聞郡

守留元長有遷學之議猶以私錢五十萬來助其役許巨川字東南溫陵人登嘉定甲戌進士第其學得伊洛紫陽之傳初董教廣庠篤志訓誨學者有所矜式人士感之建生祠于泮宮東崔與之自蜀歸聞而嘉之及為東莞令首謁學以禮殿堂廡陋出米橐十萬繕葺邑務雖繁必與諸生講解以勵術業復立小學以訓童蒙且撫摩愷悌殿中書劉克莊時為計使閱其斷訟以為仁至義盡邑人士倣郡庠亦建生祠詳見李文溪經史閣記

冷應澂字公定洪州分寧人紹定中進士知德慶州  
前守政不立縱暴吏侵漁峒獠往往致變應澂檄諭  
之獠感之欲自歸為謀主所惑不果應澂出其不意  
擒之屬縣租賦諉道阻久不至郡應澂為立期日督  
輸者與減分未至則償所減民惟恐後不一月訖事  
後直寶章閣知廣州主管廣南東路經畧安撫司公  
事馬步軍都督管領漕如故剽劇如家事吏民戴之  
後卒于官

洪天錫字君疇泉州晉江人寶慶二年進士授廣州  
司法長吏盛氣待僚屬天錫糾正為多丁內艱調潮  
州司理勢家奪民田天錫言於守還之帥方大琮深  
相推重歷官廣東提點刑獄五辭明年起知潭州又  
之直寶謨閣遷廣東轉運判官決疑獄劾貪吏治財  
賦皆有法召為秘書監兼侍講尋致仕加端明殿學  
士卒特贈正議大夫謚文毅天錫言動有準繩居官  
清介臨事是非不可回折所著奏議經筵講義進故  
事通祀輯略味言發墨陽巖文集  
許應龍知潮州時盜起贛州漸逼境上應龍亟調兵

分扼要害設間諜謹閔隘斷橋開塹區畫有方盜不敢犯既而僚屬以盜平請上功應龍曰守職扞城保民何功之云謝去日闔郡遮道泣送如失考妣焉

洪天驥字逸仲晉江人天錫之弟景定二年知香山縣至之日以教養人材為首務脩復大成殿明倫有堂主敬脩身賓賢登俊有齋皆捐俸入為之歛不及民其為政一裁於義俗譁競戢其尤桀黠者曰此囚牙訟師去則吾民安矣邑以大治經畧使洪勳趙汝暨雷宜中及倉憲交以邑最上咸淳元年轉奉議郎二年差監行在權貨務後除大理寺丞終知潮州與兄文毅公天賜文學齊名時謂二洪卒文天祥狀其行實所著有東巖集

孫叔謹字信之漳州龍溪人父昭先直寶謨閣以郊恩補官累遷至大理寺正寶慶三年出知潮州潮接漳境叔謹熟知利病即日罷行訟牒累至數百率五鼓坐廳事據案部決如流公勤自勵創橋築堤奏罷貧民益役撥田于學以養士潮人感其惠而尸祝之於韓山昌黎廟今祀于名宦祠又有宋敦書者知潮

州一日溪流湧洶隄決而西乃築隄八十餘里民免其患

薛直夫字愚叟永嘉人也嘉熙元年知雷州始闢試闈增貢士庄創建二蘇祠脩理堤渠建橋立市以便貿易遷往來始雷人不知醫藥病則召巫禱神而已乃置惠民藥局以療民疾有仁者之政民生祠

鄭良臣福州人淳祐二年任知潮州舊有白丁錢催科者據籍取辦雖有遷徙物故不為除豁良臣易籍更編民賴以安增置田稅於學及韓山書院以為養士費盖有功於士民者今祀名宦

陳圭字表夫興化人淳祐間知潮州太平橋抵三陽門正街多為居民所侵圭諭復之捐公帑市石甃工脩砌由是周道軒豁又新原道堂扁其前楹曰書庄置晦菴所著書籍實之立書院田為養士費盖有功於名教者祀于名宦

方大琮字德潤福建莆田人淳祐二年帥廣凡六年以儒飾吏以政媿俗鄉飲酒禮久廢命賓佐與領袖士討論之禮樂器服悉還古制歲一行之拜七十有



奇膝席以宴漏過三十刻時齒已邁而終禮無倦色  
丁祭儀文未稱自冕服弁以至簠簋籩豆鍾磬琴瑟  
祝歆之屬悉放古訂禮改作又建書堂之飛閣翼以  
四齋敞清海軍門以雄藩府規模十倍於昔云

李迪字復古其先趙郡人淳祐十二年知廣州明敏  
嚴於御已戢吏治盜發姦摘伏時而用之猾胥黥吏  
重足側立不敢逞郡學舊無屏門迪始開創宮墻數  
仞臺闈朔謁無下車殿庭之嫵民戶納地基錢吏以  
名色掊剋其來久矣迪一切革去自支官錢與吏作  
糜費外不許妄取一文既造朝後來蒙蔽此意寢失  
及劉應龍來奠南服復取迪條貫用之士民益勤其  
棠之思

劉克莊字潛夫興化莆田人祖夙知温州父彌正吏  
部侍郎克莊通古今熟典故最為真德秀所知理宗  
朝領史職兼兩制論建多綱常國體君身之大者嘗  
為廣東提刑仰慕崔清獻公與之表章遺文祭奠祠  
墓歎曰公之完名高節百世師也官至工部尚書加  
龍圖閣學士致仕卒謚文定有后村集行世

梁益謙荆南人宋端平中為香山令首重學校課督  
士子增學田二頃二十有六畝疏南濠之水以灌陂  
田捐俸置賑濟倉民德之為立德政碑

王亘字伯通福州人淳祐中為博羅令為政勤於吏  
事脩築隨龍蘇村二堤百姓賴其利後與單倬相繼  
知南恩州力蘇民瘼民到于今稱之

黃歲紹定間知南雄州敦尚教化初久旱歲至禱而  
有感雨三日歲大熟民苦賦役之重奏蠲之邦人為  
立生祠

師顯行眉山人景定四年知惠州政尚簡靜忽猛寇  
竊發即撲滅之人以為仁者之勇在郡五年民以寧  
一公暇手不釋卷著書自娛有文鑑集註今不傳

陳塏字子爽嘉興人歷京湖制置使司主管機宜文  
字進集英殿脩撰知婺州改知太平州兼江東轉運  
副使請蠲放諸郡災傷加戶部侍郎進寶謨閣待制  
知廣州權兵部尚書咸淳四年卒謚清毅塏屢歷麾  
節軍民愛戴幕客盛多而塏又樂薦士所著可齋說  
藁二十卷

牟滌字叔清晉江人咸淳二年知潮州脩學養士除盜去奸邦人德之祀于名宦

胡穎字叔獻湘潭人性直惡邪每見淫祠即毀之人謂之胡打鬼咸淳初經畧廣東有僧寺佛像中常出巨蛇享人祭祀僧倚以為利穎至毀佛而殺妖蛇杖僧以警愚俗其恠遂息其風遂變其剛正可法也

外史氏禁曰昔太史公傳循吏而言奉職循理亦足為治何必威嚴名言哉此守令之正鵠也嶺海去京師萬里其民習蠻野吏茲土者因其

俗而順治之自昔稱多循良如史祿疏靈渠羅弘繕城社何敞辨鵠亭之寃孫幸雪珠崖之耻葦風始二守則有錫光任延建武稱三君則有衛颯茨克揚扶而許荆周敞周憬賈琮周乘陸康熊喬皆恂恂然漢之循吏也吳則李肅鍾離牧聶友晉則吳展羊銜諸葛京南宋則陸法真梁則王琳胡穎唐有張玄素常袞鄭從讜蔣防崔珙五公餘多佚而無聞宋室休明治化翔洽周渭而下裒于胡穎凡七十有六人濟濟盛矣

粵大記卷之十一  
四十四  
若渭之去繁稅定田賦興學校凌策之謏轉輸  
省運費馮拯之括隱丁通益法林勲之上政本  
書陳橐之盡革弊蠹黃公度之言權官黃洧之  
劾貪令留正之尚名節陳峴之蠲宿逋宋煜之  
減重額林燾之免白丁錢顏橐之修楞伽峽方  
天琮之敦禮教胡穎之毀淫祠又皆其卓然者  
語曰前者後之鑑也凡百君子尚鑒茲哉

粵大記卷之十一

粵大記卷之十一

嶺南郭棊篤周甫編

宦蹟類

循良芳躅

下

明葉景龍 桂孟成 武亮 陳堅

熊本誠 索彥勝 李思迪 詹勗

郭郁隣 鍾勗 韓禎 童謨

梁潛 衡岳 白叔敏 王伯貞

鄭懋中 蔡惟溥 劉嘏 王敬

曾伯良 葉光 潘長壽 梁觀

陳賜 馮誠 王瑩 徐鑑

王源 湛禮 朱伯驥 滕康

鄭述 滕負 劉湛 聶好謙

何盛 饒秉鑑 王重 黃瑜

羅俊 周宣 李春 孔鏞

陳爵 吳中 黃瑜 方嵩

吳繹思 蘇韓 黃瑜 杜禮

伍希淵 江璞 李時敏 丁積

劉彬 李璲 黎禧 張吉

翟觀 蔣昇 吳孟謙 呂大川

瞿俊 洪祉 鄧璩 柴伸

羅僑 楊昂 丘泰 曹瑤

黃天陽 陳祥 丘道隆 王曠

蔣淦 黃正色 李桂 諸燮

葉景龍麗水人洪武初知南雄府見城西一帶乾旱  
農力維艱乃倩工築陂引凌江水以資灌溉民蒙其  
惠號曰葉公陂又興學造士稱賢守云

桂孟成温州人洪武中河源知縣梗介廉勤賞罰明  
信尤留心於學校構亭于縣治之後日與諸生講析  
經義及門之士多底于成

武亮浙江人洪武三年知徐聞縣時法制草創首輯  
歸附招集流移脩舉廢墜學校公宇煥然鼎新凡橋  
梁道路無不竭力經營民甚便之

陳堅臨湘人洪武初長樂知縣時民經兵革失業  
饑堅疏請賑給從之賴以全活者衆復奏立守禦千  
戶所創築城池民賴安堵

熊本誠洪武初任翁源知縣時民逋未還田曠未墾本誠  
多方招採之既又躬臨村落相地勢教之墾闢因土所宜  
教之樹藝恤民如子治官事如家事累遷至福建叅政  
索彥勝燕山人洪武二年以經明行修舉授樂昌知  
縣時縣無城池百姓散處山林間生息惟艱彥勝下  
車之初即勞來安集宣明政教築城開池民始復業

乃建學宮立壇壝以崇祀事復侵疆均賦役以恤民  
隱民立政績碑頌之

李思迪濟南人元進士遇亂晦處田野國初召見  
任起居注累官山西叅政洪武四年謫宰瓊山學博  
才傑廉公勤恪開拓一應翔置舉皆中度革奸貪毀  
淫祠弊極事繁辨集無虛日公餘輒歌賦自號海濱  
子因以名集蔡微序之累官尚書後又有陳槩字丕  
量北平人洪武初由吳川縣丞陞宰瓊山治民養士  
政教亞於李思迪九年遷縣學於南郊制度皆其規

畫文風丕振

詹勗字最之饒州人洪武五年知東莞縣嚴以馭吏  
寬以愛人廉介自守脩飾壇壝以嚴祀典推人戶甲  
乙以均力役又重脩廟學時海瀕寇發躬率衆擒之  
被迫繫者還其籍境土寧謐民樂其生焉

郭郁鄰山西屯留人洪武五年來丞東莞廉介自守  
日食蔬食不事飽煖邑人何原璉陳東喆饋以生魚  
被服郁鄰曰吾素志如此辭而不受疾終于官無以  
為歛邑民爭往弔賻之

鍾勗字士懋慈溪人蚤失怙恃能肆力問學以文墨自任洪武四年郡庠禮聘訓導弟子負五年舉薦赴京特授廣州番禺令政尚平易不以察察為明時官造舟富商儲貨高估以病民勗預令采山場藤木宿峙以待所需官民兩便六年颶風掀漲平地水深數尺塩倉濱江貯數百萬計浸幾及之勗躬率民丁俾家出一囊盛土石築堤以防堤高漲縮貨賴無恙蓋其舉廢興墜惠民實多而尤顓精於學校先是學圯師儒賓禮無地勗捐俸掄材構講堂齋舍未幾坐事

免歸十六年以明經舉授兵部侍郎卒于官子永亦舉明經仕至戶部侍郎

韓禎洪武十一年任布政司叅政時展築城池閩帥力欲亟成二役晝夜不得稍息軍民困苦病亡禎謂曰城郭所以保民也今築城而疲民是所謂以其所不愛及其所愛甚非安邊保民意也 朝廷聞之咎將誰歸帥始懼又欲令五鼓始工二鼓而止禎曰不可乃召衆定約以晨鍾從事夕鍾則已由是軍民赴工者莫不感悅而崇墉屹然為一方保鄣大有功於



南土焉

童謨浙江人洪武間知番禺縣密邇藩憲號稱繁劇謨一以廉謹自持政平賦均民安訟息時長樂令翠韶詩以贈之有共誇仙掌露不羨玉壺冰之句人稱為確論以丁內艱去後至江西按察使

梁潛字用之泰和人洪武丙子鄉貢進士用薦除四會知縣推誠愛民剷宿弊崇寬政臨之以平易導之以禮致尤勤撫字暇輒就學舍親授業諸生歲餘民咸悅服而爭訟息學校興流徙來歸以累千計縣有

瀧橋河世傳吏有廉平之政即河水清自潛至訖去河水澄潔可鑑又明年改陽江興利除害政簡刑清後調知陽春治之如四會而陽春徭徭環處稍不得所欲即默怒跳躍不可制潛待之如子而不拘於法民亦皆盡誠事之如父敬恭命令唯恐不及所歷之處將去人皆遮道留之不得至有流涕者永樂元年徵脩實錄陞翰林院脩撰五年命以本官兼右春坊贊善進侍讀以事實于法卒有泊庵集行於世衡岳汝寧西平人其先世家隨州父通元季以武功

起家官至百夫長屯香山國初棄官歸過西平道梗不通遂留家焉中河南鄉試遂昇太學三十年詔國子監選諸生通理道者赴詹事府議事六館之士咸推岳往敷陳時政切而不迂所司以聞擢廣東潮州府同知岳約已惠民自常祿外饋遺一無所取布衣蔬食不異寒士嶺海間翕然稱其廉三十五年遷陝西西安府知府其清操善政如在潮時

白叔敏不知何許人洪武十八年知潮州府興學校課農桑持身清白人不敢干以私時潮多絕戶荒田稅糧令民贖納至鬻子女不能給敏奏除之至今人懷其惠

王伯貞名泰以字行泰和人洪武壬戌以聘應詔試經學時務上親擢為第一授廣東按察僉事分巡海康問民疾苦除害興利上疏振寬滯恤孤寡防海寇及極鹽法之弊又言宋寇準於雷州開渠引呂塘水灌東洋田萬頃勝國元帥府以兵守閘廉訪掌局鑰以時閉泄歲屢穫今渠淤塘廢東洋田多旱請開濬利民會罷分巡召還改工部主事尋以憂去坐過

期謫舒城復薦擢瓊州守民間喜曰是嘗巡海康能  
興利便民者必能惠我至則以平易寬厚為政吏民  
安之先是崖州尚黎以私怨相讐殺府衛利漁獵歆  
加兵伯貞執不可曰果勢張盛今幾數月城當連陷  
而鄰境尚得晏然阻兵不行庶知寧遠丞黃童可任  
事命往察之還報如所言致為首數人檻送京黎得  
無事老初感泣曰微公吾屬魚肉矣下令皆趨命流  
粟其惠不知有餘人瓊民立生祠祀之繼下內艱服  
終身不為親戚以疾卒時年七十有一所著有瓊州  
集正統中以子直貴贈吏部尚書

鄭懋中名醇以字行晉江人由郡庠陞太學洪武丙  
子領應天鄉薦三十五年擢知程鄉縣寬恕廉慎治  
先禮義不尚法律自奉淡薄無所取於民有豪猾吏  
素為民害懋中至首按之死于獄民大悅爭訟者至  
庭輒以理委曲諭之或未悟令退而思之卒感服不  
施鞭朴詞訟以簡縣中稱治謠曰鄭懋中真長者禁  
令不煩徭役寡斯民相見何嬉嬉昔日無羊今有馬  
初程鄉民鮮知學懋中至首作新學校親為生徒講

解自是始有進士登第者一日感疾戒其子及戒其  
吏章華曰爾領縣事須體我心毋害我民言畢乃具  
湯沐正衣冠就寢瞑目而逝民哀慕之共舁其喪歸  
塋復立像於漢令曾芳之祠合祀焉

蔡惟溥泉州晉江人永樂三年由進士擢知香山縣  
性純篤喜怒不形勸勉學校撫集逃民時邑有三虎  
為患惟溥方畧率民捕之自是虎患悉除閭里以安  
任滿邑民保留不果後陞知欽州為政如香山尤切  
切於撫字州治稱平

劉瓚字廷珍歷城人由進士累遷大理寺丞永樂二  
十二年同邑人有為顯官者得罪坐貶連州知州時  
州民溺於姑息之政犯者相繼瓚至悉繩以法不少  
貸於是遠近相戒不敢犯而敝俗頓革陞蘇州府同  
知歷官僉都御史

王敬天台人永樂七年知雷州府先是府多囚繫敬  
至悉為剖決數日之間一獄盡空府境被潮水民多  
溺死敬設法調其家多賴存濟任數年後民安訟息  
歌之曰王公來遲使民無依今公蒞政惠我無私

曾伯良南城人永樂八年知海陽縣親篆後立碑於  
城隍廟曰有外施仁義內藏禍心者神必殛之又書  
清白傳家四字於寢室民愛之如父母及滿去父老  
持禮幣贖之一毫不取潮人慕祀之

葉光閩人永樂間由文學出身為南海簿蒞政之初  
凡事遜之於尹蔬食自如吏民不敢欺繼掌邑政始  
終無玷滿去民咸歌曰南海簿真不貪百鳥鳳人中  
難

潘長壽字煥文長興人恬靜好學洪武中舉人材不  
官僉都御史永樂十年左遷為南雄府知府慈祥愷  
悌不任刑威時夏秋旱屢禱不應捐俸募民拾遺骸  
瘞之野率官屬齋戒請禱得雨三日歲大稔

梁觀字大用當塗人由國子監生擢吏科給事中永  
樂十六年為廣東按察僉事剛介廉平能振風紀分  
巡潮州疆寇劉晚等二百餘人嘯聚山澤守衛官將  
發兵剿之觀曰民貧不得已為盜以兵臨之則殺戮  
必多得無誤良善乎盍使之改過遂傳檄諭以禍福  
晚感悟即率衆來歸一鄉之人遂免兵禍後以疾卒

于潮軍民老稚罔不哀悼肖其像祀于韓祠

陳賜字益嘉舊姓饒福建甌寧人舉進士永樂七年授監察御史滿考書最遷南雄府知府慈以撫下威以伏奸寬猛得宜泣事精審廟學久敝撤而新之洪熙元年奉 例申豁二邑虛糧二千餘石民困復蘇

馮誠浮梁人永樂初由進士宣德元年授知香山縣感而不猛寬而有制廉而不剝甚得牧民之道時海濱生田豪右占據興訟連年誠為斷之其訟始息以外艱去民尾舟送至庾嶺而還後擢監察御史歷官

湖廣按察使

王瑩鄞縣人由刑科給事中宣德六年出知肇慶府興利革弊知所先務高要有李伯從者為讎家所誣坐不孝繼母母卒而獄久不決瑩至立訊其非而釋之瀧水有鄧顯佐者以蕉根造為偽印事露繫獄經年瑩察其不成篆文竟得減死城西失火延燒民居即籲天而火隨滅增脩水利作興學校禮賢下士切於愛民至今頌之

徐鑑字子明宜興人宣德間以戶部郎中奉 勅守

瓊廉靜寡憇孜孜愛民為政簡易大率以勸化為主  
不事刑法恂恂有古循吏風節財用貸逋負教民樹  
藝興學課士郡多異產中使阮常馮三人歲來索擾  
見鑑嚴正不可犯且為上屬任稍斂戢繼有三人  
踵至凡非所當索限有司弗與及行所部輒遣騎從  
之俾不得肆武官利黎產多啓釁以邀賄鎮以無事  
皆按堵不為變民漸黎俗病不服藥惟殺牛祭鬼至  
鬻子女為禳禱費鑑以佛老雖非正然不害物命猶  
善於此乃許鉅室脩飾寺觀以移積習自是有病者  
不殺牛而民用稍紓在瓊四年宣德癸丑秋卒同王  
伯貞祔祭於東坡祠成化初始為二賢專祠弘治初  
以孫溥貴贈禮部尚書兼文淵閣大學士

王源字啓澤龍巖人由進士宣德十年任潮州知府  
寬明仁恕初城東有長橋二十餘丈歲久圯壞民病  
於涉源乃壘石增砌作樓檻其上而新之城西湖山  
多怪石氏歲罹患源命亟除之至下果獲石枯骸復  
掘丈餘又得石刻回風二字應郡中舊有挽回淳風  
之識潮多水患源築圩岸障田廬復置鄉庠設鄉社

立警舖政平訟理士民不忍欺及去百姓立生祠以  
祀歲時有司致祭焉

湛禮錢塘人正統元年由大理右寺正擢任韶州知  
府舊令歲貢黃藤貨於南海以充曲江縣豪民二十  
餘戶以糧役委之里甲投千戶所充軍禮以事聞得  
悉罷復於府庠蓋屋四十間以便講習嘗遣隸卒樂  
昌督稅稅完卒求資未欲歸縣尹械以詣府人多為  
尹懼禮嘉之以為知體甲有誣乙田自益者禮判歸  
之乙甲憤怨誣訴於藩司司知其然拘甲歸諸府治

之人皆為甲危至則問之曰爾從陸路來必辛苦困  
悴且歸寬慰父母心後五日乃來辨折存心慈祥類  
此故在任墾田加增既去民猶思之

朱伯驥字千里通山人成化癸卯舉于鄉築室溪南  
專精墳典復任廣州推官精于聽斷兩造成服從白  
沙陳獻章遊浩然自得退而上書論古今人才不相  
及白沙以為知言遂棄官歸橫經講學士夫推重之  
滕康字景晉甌寧人正統初惠州通判郡嘗阨於洪  
水而糧應海運康力為請得近輸又請減虛稅之病



民者民德之或醵金以餽康一無所取歲己巳廣州  
寇起康竭力警備與民固守寇偵知有備引去藩臬  
交章薦之陞本府知府為政益勵民益歸心焉

鄭述字季述莆田人永樂辛丑進士授刑部主事正  
統初左遷惠州府通判勤於其職監司檄委叢集無  
弗辦者先是民居茅茨竹椽久而燥則易災述乃令  
民陶瓦構材為棟宇環之以堵身往督勸賞其先就  
者而察其不足者振給之茅竹之俗一變自是無火  
患百姓安于夜作郡人吳高曰唐宋璟刺廣之政也

壬戌當道保薦陞南雄府知府興利除害急所先務  
新學校脩凌陂重砌嶺路九十里痛革過嶺夫役之  
弊節省而均之招集流移二百餘戶事有閼繫廢無  
不舉足稱循良云

滕負甌寧人正統三年任韶州府同知明察內敏退  
食自公無闇昧之媿七年監造黃冊吏不敢欺訟者  
不敢以無情至值歲歉公私無積貯守以下無籍手  
地負至傾囊得白金若干兩告糴鄰郡命里耆籍民  
之窘甚者朝夕給之全活數千人郡治舊為淮王府

王遷國之饒得請復為郡其規制侈大非人臣所宜  
居又吏胥公退無所於處往往雜就民居負載長縮  
大削雕還樸復為郡治如常式又度地為吏舍限其  
出入絕吏民交構之弊自昔郡吏惟取充數鮮有工  
文墨者動輒假手他人負痛革之凡上下文移具為  
成式以示吏俾其如式草創而為之潤色焉受其指  
畫者後皆通習所部地介江閩湖三藩之衝主戶少  
而客戶多少拂其意輒相扇弗靖而翁源乳源二邑  
尤甚員躬行巡省揭榜開諭許其占籍遂與編戶無  
異凡郡之政員方一一興革之即以丁內艱解任去  
比聞服闋耆老數百人詣 闕乞再任以已除代者  
不允會貧適至擢禮部郎中後死於土木之難贈奉  
政大夫并贈其父母蔭子弘為國子生  
劉湛字嗣澄桂林人由舉人正統間任潮州府知府  
時有漳寇林烏鐵等擁衆擾郡之三饒勢甚猖獗湛  
躬統民兵剿捕殆盡郡中二年稅糧民苦荒歉不能  
輸湛奏免民甚德之

聶好謙字用義豐城人登進士正統十年由刑部郎

中知廣州凡政有益於民者不顧利害為之決獄平  
恕時新會斗崗山民嘯聚藩臬檄好謙往撫之喻以  
禍福賊皆感泣歸欵十四年黃寇越獄聚衆攻城城  
中人衆食寡好謙恐其生變即白藩臬發倉賑之或  
持不可好謙曰擅發倉廩其罪猶小若民饑生變禍  
不可測事始大耳與布政戴弁卒發之全活者甚衆  
是年冬以疾卒民傷之都御史楊信民詩哭之曰平  
上兩行淚深為越人傾

盛大興人由舉人為六安州知州景泰初陞知高  
州府公明剛直抑強扶善興利革弊禁淫祠絕巫術  
自是百廢脩舉所屬奉法又建讀書帷於府學之右  
以較士設排柵於城外以保障居民時有西寇犯境  
則激勵軍民截捕有攘寇功云  
饒秉鑑廣昌人由舉人景泰間任肇慶府同知公正  
廉明聽訟理財皆愜人心尤能作興士類循理學校  
秩未滿陞廉州府知府嘗獲賊三千有奇人民安堵  
巡撫都御史葉盛移檄旌之又有李福海蒲圻人時  
知陽春縣撫字有聲秩滿保畱再任陞六品俸後奸

民林積豪以私意竟誣其去然遺愛在人自不能泯也

王重字任重安福人景泰甲戌進士七年知新會縣臨民以莊處已以嚴法司羅致之獄待以刑具重曰願以官相還毋以刑也從容不撓部民同於拘孿者承奉多方巍然如在堂上時教縣丞陶魯如弟子後魯遂有聲名在官五年卒囊篋蕭然

黃瑜南城人景泰中由舉人任四會知縣未幾以憂去天順三年服除起知開建有守有為不挫不撓邑被流賊劫掠瑜植木柵以守親弓矢以禦寇盡心撫字民皆思之成化二年以當道論薦陞雷州知府時兵荒相仍竭力撫字盜息民安秩滿加叅政俸留任涖政最久故其惠澤及民益深

羅俊字承彥泰和人進士景泰間御史言事謫新會縣典史日與諸生講解文字而已凡見童子氣質之美者必令向學擇塾師教之無事則觀書養性于于然不知其為謫官也性剛不容人過人多憚之天順元年遷仁化縣知縣守廉行公恤民禮士士蒙其化

民被其澤後陞知潯州府以憂去成化間知南雄府  
公廉寬厚有古循吏風時兩廣盜起都御史韓雍奉  
命討賊好事者或請豎木柵意在侵漁俊力請罷之  
脩府治築新城俱措置無擾卒于任百姓哀之

周宣字政舉龍溪人正統乙丑進士為戶部主事天  
順二年擢潮州知府首脩文廟葺韓江橋築海隄有  
土豪盧姓者暴橫鄉里宣擒獲不即加刑諭以道義  
而遣之豪叩首謝罪遂變為良民嘗平海寇語在外  
志事聞朝廷遣官齎表裏賞勞之廝役以下并及焉

陞山西行太僕寺少卿尋陞太僕寺卿賜食正三品  
俸仍掌寺事繼而丁母憂卒于家

李春慶遠人監生天順初知南雄府凌江驛舊有車  
驢散民間畜之運官貨驢死役存苦及子孫春嘆曰  
烏有是長生之驢哉遂奏豁之又以桑絲徵本色土  
無出產科費數倍奏允徵米省三之二民甚德之  
孔鏞字昭文長洲人甲戌進士始令南康都昌以內  
艱去改任連山時縣為流賊所破據為巢穴官吏人  
民多被殺虜餘皆流徙他郡既至邑無治可施依州

而居始召邑耆與議訪民疾苦招撫流離民始漸集  
乃募敢勇集義旅缺食者賑以官廩失業者撥閑田  
俾墾缺牛種則官為給之而民食始繼天順六年春  
大兵征諸蠻峒鏞率義兵為鄉導首破賊巢大兵繼  
之始復縣境迺遷縣出鷄籠山城為治所民始有依  
創縣署及學與壇埤諸司舖舍官始有治凡克賊壘  
先拘賊所俘虜男婦於一所兵不敢及民賴以全撫  
招徭衆歸為齊民䟽鑿井泉通長迳山路便民之政  
畢舉連山賢令自設縣來惟鏞一人而已成化二年

以功超擢高州府知府舉邑如失父母先時西寇侵  
郡境四方土寇蜂起數百里無鷄犬聲鏞至跋履山  
川躬擐甲胄督率民兵前後擒斬賊首四百七十餘  
名顛奪回被虜男婦四百五十二名口及設法招撫  
安插殘賊男婦九千七百一十四名口民夷畏威懷  
德以府城外排柵築崇垣以易之附郭居民至今庶  
其保障又立社學於府門右訓誨官民弟子之俊秀  
者尋陞廣東按察副使賜 璽書仍守其地於是劇  
盜梁定侯等皆受招撫處之內地分地與耕以備他

盜部下有黎浩林雄數人皆有謀勇而雄尤為拳捷  
後死於賊鏞撫尸慟哭親為殯葬一軍莫不感泣用  
是民夷感畏所至成功後聞母喪還守制軍民泣送  
有出千里外者在高四年因圍空虛四民復業而風  
俗亦漸丕變服闋補任廣西官終兵部侍郎丘濬為  
作傳云

陳爵字良貴南靖人天順丁丑進士四年授揭陽知  
縣寇起歲荒爵乃捐俸易穀以濟築城濬池籌畫有  
方寇環攻之月久不能下遁去因率衆平之當道以

聞進階六品掌縣事成化二年擢韶州知府民有慮  
甲謝乙兢田甲不能舉其契夜托隸卒餉銀若干兩  
爵以銀輸官以田歸乙人服其明潔府外門無妄入  
者微若廟壇祭胙俱無所取散之諸生資其勤苦創  
府學講習房四十餘間重建外門明年以外艱去服  
除改知高州未及一年而卒高人情之輿觀過潮揭  
陽民奔臨哀奠復立祠祀之扁曰遺愛

吳中字時中樂平人進士天順五年任東莞令將三  
載百廢備舉巡撫都御史葉盛薦守惠州去任日士

民為立遺愛碑後一月東莞賊起都御史韓雍檄中  
擒捕中馳至下令出首能相捕獲者免其罪復以十家  
為甲出入相賙禍患相保婚葬相助一家有事九家  
連坐旬日渠魁斯得雍喜其能復留中巡視海道守  
增江口控扼盜賊中至即編蛋戶為甲各漁其海遇  
賊舟則尾至其地賊以其漁不忌也既得其實即遣  
人捕之不閱月賊亦屏息越六月雍以更賢育民事  
例奏改中知廣州府以興學校勸農桑均徭役撫恤  
困窮為已任解宇壇壝城池學舍為之一新又延肇

慶府學教授王文鳳編輯廣州志甫成中以憂去

黃瑜字中美桂林人由舉人天順七年任肇慶知府  
時蒼梧未建鎮西流賊劫而東屢至府城瑜先設備  
而境內獲安各屬城池悉經脩理民永懷之時有雷  
州府同知泰和劉昇寬和簡靜優於文學與諸士講  
學不倦儋州判官四明呂琳興學校化刁強除盜賊  
皆有政聲云

方嵩字惟嶽崇仁人天順八年以監生任陽江縣知  
縣年高苦節又遭流賊攻劫城池乃不携妻子衣食



儉約成化四年督府韓雍榜文招撫流民高極力撫  
循雍奏免租調秩滿准再任成化十四年陞任去嘉  
靖戊戌奉祀于名宦祠

吳繹思莆田人天順元年進士成化中守惠蒞政果  
斷屬邑有豪蠹虐民前政莫能制繹思至竟繩之以  
法守禦軍政為上官所更張卒伍忿其不便將為變  
繹思聞之往諭以禍福咸帖服常增脩諸邑學宮衆  
務咸舉後改潮州遷浙江叅政累官右布政使  
蘇韡字廷茂江陰人以萊州同知成化五年陞韶州

知府心公而恕政簡而明吏民軍士徭徠率皆悅服  
先時府治前門不稱觀瞻履任初遂創立譙樓五間  
兩幕吏舍庫藏囹圄悉相宜更整脩理府學重建大  
成殿務為壯麗又相隙地立先賢衛道祠神庫神厨  
饌房十餘間櫺星門明倫堂俱飭舊成新外而城池  
壇壝偕樂亭薰風樓悉仍舊創舉雖前後費出萬計  
皆由措置而成民莫知其所自若郡誌書張余二公  
文集又獨捐已俸脩輯刊行不二三年百廢皆作田  
野闢增五千九百九十餘頃戶口新增三千七百九

十餘戶八年冬流賊逼近郡界譁寅夜移檄屬縣各設法保鄣又與千戶趙雄協相等畫精選民快軍餘登城守備晝夜必親巡警時賴以安每憂歎曰在城人民庶可保全外處鄉落者雖有營堡防禦安能使其一一全生念念于心不遑寢食憂民之至如此自是屢以老懇辭郡邑父老詣當道保留者數次十年秋以禮致仕還日送者遮道在任不為烜赫之政而軍民陰受其福焉

黃瑜字廷美香山人也成化四年以舉人授長樂知縣廣惠為隣郡瑜曰吾鄉人蒞鄉人化而後政之初儒學在郭西鄙乃亟遷今所日與學官弟子論經史而脩飭群廢重建養濟院以舉恤政百務脩舉分毫

不取於民時劇盜盧公林聚山為亂瑜召諭俾改行及致事去公林父子親肩其輿過黃土嶺因賦一詩以遺之士民至今思之不忘

杜禮豐城人以鄉貢為同知廉濱海民夷錯居寇盜每設毒弩殺人久益滋蔓禮乃往撫諭安置黃亨輩一百四十餘戶于摩塘諸村隙地築石隴土城百四

十丈為堡令復業流民二百餘戶居之皆給牛種令  
開荒田為業編排甲以約束而民始輯寧郡城西門  
有古渡圯而病涉禮造石墩十六座駕以木梁立壩  
亭設廩舍又度羅勝岡荒陂以石障其上流引水為  
田十餘頃分給流民耕種海有盜珠者登岸劫掠即  
擒其首惡數十置之法餘黨解散立社學以教民徭  
子弟尋陞都勻知府

伍希淵字士賢安福人天順甲辰會魁進士累官刑  
部郎中成化十一年以誥誤謫廣州府同知十四年  
擢知府專為政以通民情為先承上接下動中肯綮  
興革利害雖嫌不避士大夫多稱之尋遷廣東左叅  
政終廣西右布政使

江璞字伯溫貴溪人進士成化十一年知南雄府才  
氣英邁合兩學為一創大中書院重脩太平橋躬通  
濟鎮居停客貨取貲以紓民力疏免稅糧蘇民包納  
之困郡人思其惠附祀于景德祠

李時敏樂平人由舉人成化間任信宜知縣廉能公  
正寬厚撫民在任九年保陞化州知州撫恤疲民脩

復學校凡州堂解宇次第而舉又九載得遷長蘆益  
運同知民不忍舍乃建去思碑立祠以祀之

丁積字彥誠贛州寧都人成化戊戌進士知新會縣  
始至問民俗曰富而不教令之過也見詞牒倥惚好  
越訴曰令之不足於政民弗靖也乃下教令明約束  
抑強扶弱苟罹於法雖日侍左右者不少貸民始知  
有令越訴者止遠斥干謁病邪如讐歲省在官之費  
薄取之民民侈且僭則為申明洪武禮制叅以文公  
冠婚喪祭之儀條為品節為禮式一書擇鄉之老成  
者主之月朔進問於處優禮其能者民多以賭博喪  
家痛懲之又取其子弟之少者聚廡下使日誦書以  
變其習春秋祀禱品物必極精誠立廟墓祭田以崇  
節義毀淫祀以去民惑既得疾羸甚尤日究心民事  
年四十一卒于官士民哀慕立祠以祀之

劉彬吉之永豐人成化十五年由進士為程鄉令下  
車廣布威信且明習吏事諧舞文者以次摘發恤民  
隱振士習凡百紀綱日就脩舉乃建社學書院教民  
間子弟出俸餘以市學租供東西南三社學之費建

都里義倉以待荒歉且廉以持已衣食輿馬之奉省約如寒素時在任凡九載始得遷雷州府同知為政益著廉介無私聽訟無枉但不能卑屈以悅當塗致仕而去士論服其高

李遂天台人由進士成化十四年擢肇慶府知府學問該博胸次豁達常督儒生講學躬行畝畝勞民勸耕士民樂業申免太監進取異禽民甚稱快竟以剛介獲謗去官歸舟行李蕭然士論惜之

黎禧陽朔人由舉人成化九年知增城縣立心廉恕刑清政舉廣築磚城民賴安堵脩建學校人才振作秩滿改新淦尋陞瓊州府通判致仕卒增江士民慕之從祀名宦祠

張吉字克脩餘干人登成化辛丑進士授工部主事時左道李孜省僧繼曉以符水進吉劾之謫判景東土官陶洪以吉空囊無家謀為置妾遺以銀器俱不受遣子受學夷俗化之弘治改元遷肇慶同知脩築豐樂長隄以防水滂民德之號張公隄知梧州府崇正學飭文廟樂舞政教並行陞廣西兵備副使值北

虜侵邊陳便宜策獻偏架弩隨進正心之說以寓諷  
諫累陞貴州左布政使卒嘉靖中潦水常滿民賴隄  
以防益思其惠乃於寶查都立張公祠以報祀之所  
著有三朝奏議陸學訂疑貞觀小斷諸集子求進士  
御史論諫有父風

翟觀桂林人弘治二年由舉人授瀧水知縣以弭盜  
安民為急三年丁父憂去未幾殘孽復萌民苦之奔  
懇保留陞肇慶府通判進同知仍掌瀧水縣事在瀧  
務為民立永安計於巴東西立二營集兵統守僻荒  
田九百頃鑿水圳四十八處灌之立五十九寨於鄉  
村以防諸僮招逋逃賑貧餒邑無僮寇之患尋進階  
四品而歸邑人立碑頌之

蔣昇字誠之廣西全州人成化丁未進士弘治初知  
南海縣誠心莅政吏不忍欺雖無赫赫之聲而民至  
今思之後累官戶部尚書長汀廖輔者弘治二年知  
連州政事明敏士民畏服又有浙人何昌言以監生  
知增城縣寬和蕪靜有長者風士愛民懷足稱循吏  
吳孟謙莆田人家貧自起為府小吏性峻潔容止端

莊同列對之無敢有惰容弘治三年來丞順德民供  
折柴薪錢孟謙曰丞何功其受此哉廣之後山用兵  
孟謙供餽軍旅山盤水運風雨浥爛數損於舊孟謙  
悉以已俸償之人無知者卒于官前翰林鄒智誅之  
曰君裳蕭疎君貌喂囁坐久無言言無破碎與長官  
俱庶事悉委公庭如寺詩思如水於乎若孟謙者其  
不負丞哉

呂大川字中源新昌人成化甲辰進士弘治中守惠  
州才識精敏判決如流吏不能竄其私至于簿書米  
鹽皆有條法時鐵禁嚴商人無隙致賕因大川少子  
出就學饋千金其妻乘間言之大川怒將罪其子商  
人驚遁乃已郡城東北瀕江恒患衝齧大川始築土  
甃石為巨堤以捍水某所淫祠鄉人謂其能為禍福  
事之謹有狡訐者昇土偶通衢繆拜而號焉大川命  
沉之于江杖其人而遣之正德丁卯征劇賊張權隨  
軍督餉察諸俘之勝從與其誑誤者釋之所過鄉聚  
召耆老諭之以禮南海張詡曰呂惠州之政雪霜內  
有陽和戎馬中行俎豆者也卒于官

瞿俊字世用常熟人狀偉岸不脩邊幅而廉潔風威  
動人成化己丑進士為御史出按于江西刺舉不避  
權要治贓吏無縱舍者弘治四年遷廣東按察副使  
兵備海南先是黎人時出寇掠俊戒約羣吏脩軍政  
諸黎戢不敢出嘗有貴臣家撓法俊治之律已廉不  
可干以私人以為矯亢鄉有巨室子薄游謁俊于官  
俊飲食之慮其飭法命官傳送出境卒死道中在廣  
臬出見市筭者呼而入分筭給諸僚有僚素乏清譽  
倍給之問故俊曰君庭多穢耳僚捉研擲之俊被傷  
自江右還朝縣令祝獻知其清苦遺以裝金俊却之  
祝益之使吏饋于途俊怒欲執吏付于官吏亟馳去  
入朝以病乞致仕 詔允其請家徒壁立有圖書數  
百卷而已

洪祉字天惠安仁人弘治八年以舉人授龍川知縣  
不以家累自隨視民如子徵稅弭盜率有方斷獄明  
恕尤以興學育才為己任縣故事里甲日致供具祉  
峻絕之卒于官囊無遺貲邑人哀之既護其襯歸鄉  
復易地構祠表曰清節肖像祀焉



鄧璩宣化人弘治間知雷州府廉介剛方不避權貴  
接珠池內侍持正不屈上司督責吏治雖或挫之猶  
自若也疏戴公渠興學崇教有循良之稱趙渾漳州  
人由進士弘治間知雷州府廉介不污決獄無冤踰  
年去任囊橐蕭然時徐聞令貴州平鋼者以舉人任  
清介平恕時縣治附于海力遷之不果而卒子孫因  
留家焉又有吳朝陽瓊山人以舉人掌雷州府教事  
真率簡淡訓迪有方杜寬安定人亦以舉人任遂溪  
教諭沉靜簡默條法嚴明卒于官士林哀慟云

柴伸雲南人弘治十二年知龍門縣才行卓異惠政  
及民城池公署多所建立後卒于官民立木主以祀  
之嘗著愚牧解為人所傳誦

羅僑字惟升江西吉水人弘治十四年以進士知新  
會縣政有實惠士民德之崇重白沙之學遵丁積治  
邑禮擇用都老訟平盜息建譙門脩城垣歷四載擢  
大理寺評事劾權宦因歸于家尋起為本省叅政邑  
民歡迎如見父母未幾以老請上疏陳情不待報而  
去士論高之

揚昂字孔顥建安人以祖文敏公榮蔭入監弘治中  
知香山里胥以其出於相裔也或遠迓焉昂曰是欲  
為陽鱈者邪斥而遠之饋送一無所受涖政愷悌上  
下皆稱其廉能巡按御史聶賢疏言宜治繁劇遂調  
順德益勵清操其政如香山時以節愛為本考滿致  
仕去後其子崇來為僉事二縣之民爭先快覩曰此  
吾舊父母之子也其遺愛如此

丘泰福建莆田人弘治十七年以進士授新寧知縣  
性行剛果涖政仁明決訟如流一月而政務清理時  
有三四滯獄十年不決泰至即平讞之境內豪強屏  
息盜賊聞風潛消民始獲安堵矣未幾以丁外艱去  
城中無大小咸哭于舟次至今言寧邑賢令必以丘  
為稱首云

曹琚字仲玉郴州桂陽人弘治丙辰進士累官工部  
郎中正德三年來知廣州以教化為首務敦行鄉飲  
作養生徒性剛勁不為勢利所動時中官有奉命  
查盤者勢灼甚或勸折節以免禍琚曰拙於奉承得  
禍或淺巧於奉承得禍必深吾寧拙不能巧也每事

裁抑之中官不能堪乃欲重盤郡庫以洩憾琚抗言  
不從亦畏沮終不能加害海濱田產蠱蜚害稼民養  
鴨飼之稱便總督陳金議徵鴨埠之舊以充軍餉檄  
琚規畫之即携行李一挑自隨巡行七邑防檢惟力  
每發即集官吏於庭檢示乃行及還亦如之嘗行番  
禺道中有得木牌來告者視其所書則後山殘民也  
自言被誣為盜喙息且死乞招撫以延旦夕即上其  
事于總督招之得男婦數百人而後山盜日靖廣商  
例納給引錢舊多自私琚以五分為率貯其三於庫  
備賑濟二以為公用農民例納紙價罷之曰是求仕  
而教之以貪也派料物解京者舊攬於豪猾每侵尅  
不完乃勾稽加懲且令州縣擇均徭之殷實者領焉  
當道以為宜至今為例然持法不撓卒為富路所陰  
中辛未調廣西梧州府士民爭送之百里而遙後山  
殘民朱福洪聞其去集健夫數百護舟以行其感人  
如此

黃天暘莆田人正德九年以舉人知英德縣剛正嚴  
明不畏權勢時寺人遣取英石暘曰石無用之物何

必勞民若主欲觀山親詣九嶷更為奇特卒却而去  
脩文廟黌舍財力不擾于民及調官去任民遮道扳  
號者以千計

陳祥字應和高安人弘治十五年進士歷官御史正  
德乙亥惠州知府廉公有威加意犒獨均賦役省冗  
費興學校戒賭博禁私屠嚴巡警條網振飭民逮訊  
者遇農時輒暫縱之先是吏卒相比詐為公移下鄉  
為奸利祥至始跼蹐不敢逞博羅陳祖榮歸善王雪  
真者故郡中大猾也皆捕寘于法於是深山窮谷莫

不懾服稱神明矣戊寅遷廣東按察司副使官終右  
副都御史

丘道隆字懋之上杭人正德甲戌進士乙亥知順德  
縣嚴明果斷吏民畏服正德戊寅歲饑勸富民出粟  
以賑之剪除宿寇毀淫祠脩黌宮學校煥然一新三  
載遷御史嘗上疏言佛朗機素非通貢之國今入廣  
將為變乃命海道副使汪鋐逐之嘉靖壬辰擢南雄  
府嚴毅方正事先大體興學校脩橋梁僚屬奉法吏  
不敢欺嘗大書畏天悲人四字揭之燕居以自勵

王壙字存約黃巖人弘治壬戌進士歷官吏科給事  
中正德十五年以言事謫惠州推官惟一僕自隨理  
淹繫哀無辜獄有重辟之疑者詳白于守得減死論  
尤好招延士類講學且察其秀而貧者調焉兩庠之  
士翕然宗之未幾遷秩去官終都御史

蔣淦字汝潔全州人正德辛未進士嘉靖九年補惠  
州守政先仁恕訟獄至者不煩鞭朴而皆得其情歲  
屬攢造力杜飛詭窺避之姦於是徭役適均貧民稱  
便尤加意學校凡殿堂齋舍脩建一新亭祠樓館城

壕道路亦皆葺理不以煩民三年以考績陞河南左  
叅政屬邑故有長夫之餽皆却之官終工部侍郎  
黃正色字士尚江陰人以進士為香山縣令盡心民  
事明爽通敏剖決如流發奸摘伏出人意表人自不  
能欺之邑之墾田多為番禺順德新會士夫豪民所  
奪占乃寄庄戶糧至萬餘石連年逋晚糧役貽累里  
甲代償民積苦之正色徇知其弊申撫按司府令寄  
庄戶各就近倉輸納解運邑民翕然稱便視事方一  
月改南海令首邑政煩百務叢沓正色以敏捷之才

涖之閱月而積案盡清晝間無事則坐堂上彈琴以  
自適其政務抑豪強而恤孤弱禮賢士大夫而嚴胥  
史吏畏其威民沐其愛自南海有令以來皆不能及  
也召入為監察御史風節凜然後以直言得罪發戍  
遼東子學海壬戌進士歷官贑州府知府

李桂字廷芳全州人嘉靖十七年以舉人教諭擢大  
浦令沉毅剛介公廉明威不避權勢決獄發奸如神  
百姓咸服本縣多僧田近例重徵軍餉桂因民訴輒  
為申省之民苦於三河灞稅桂亦為申革節用愛人

崇文作士簡徭役賑困窮抑強梗卓有古良吏風故  
政聲昭著屢膺當道之獎明年以憂去囊無餘積諸  
生義為呈助路費護歸知府鄭宗古率僚慰贖百姓  
遮道垂泣而清遠都民留靴繪像議立生祠于都以  
祀之

諸燮字子相餘姚人嘉靖乙未進士以兵部主事謫  
潮州府通判二十一年署惠來縣事時縣初草創政  
平訟簡視民疾苦若恫瘝在躬先是南城逼縣治民  
居弗安二十七年海寇掠城外乃召耆民莊文鳳等

曰城外民居寇至無以為守城南空虛湫隘非縣治所宜今宜開拓數十丈以圍民居所謂一勞永逸者也衆深宜之乃申請如議費役有經規模宏廓民得奠居無寇賊疾疫之患皆燮之力也

外史氏棊曰我

明以六條察吏以三載考績進其賢者才者而汰其否者又表其卓異者惟賜璽書褒美之一時吏治斌斌奮起五嶺以南彙多循良今列名于傳者百有餘人洪武中十七

曰城內民者送五無以爲守城而空城之無守也  
所宜今宜開緝數十夫以開民居所謂一帶及遠者  
也衆深宜之乃申請如議費從有經理操案願民得  
莫后無致賊疾疫之患所實之力也

外史氏某曰我

明以六條察吏以三載考績進其賢者才者而致  
其否者又表其卓異者

賜書褒獎之一時吏治城奪起五嶺以南  
身請民今列名于傳者百有餘人隆武中十六



此處文字極其模糊，似有數行，但難以辨認。可能包含地方志或考績記錄的內容。




人而葉景龍築凌江陂熊本誠建樂昌城韓禎  
保鄣一方梁潛惠養三邑王伯貞之濟呂堰息  
黎兵其最也求樂中八人而王敬民安訟息梁  
觀馳檄化盜陳賜之豁虛糧二千石魯伯良之  
清白傳家其雋也德統泰順之朝則湛禮滕康  
聶好謙孔鏞吳中為之冠成弘正嘉之世則張  
吉丁積曹琚蔣昇陳祥黃正色植其表皎皎朱  
絲煌煌玄鏡照臨茲土煦育群生即百世尸祝  
之可也嘉隆以來或棠思方殷或輿論未定尚

何采錄非云遺漏詩曰豈弟君子民之攸暨凡  
沐膏馥者敢忘繹思哉

吉丁前曹部郎吳刻辨黃玉台蘇其未始知米  
華致結在韓吳中然之說次以五毒之世限亦  
貴白新宋其辭也然然未則之陳限數數亦  
賢如然出盜朝觀之繪畫雖二千不曾出身之  
亦其其景也亦樂中八人而王端方與徐思樂





Vertical text on the right page, likely bleed-through from the reverse side. The characters are faint and difficult to read, but appear to be arranged in a column.

